

ASO LULU, 17 FEPUARI 2021

Na nofoia e le Fofoga Fetalai le Nofoa i le itula e 9:23 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoao Faitulafono.

Ia, malo le lagi e mama ua faamalo foi le soifua manuia i lenei taeao fou.

TUUINA ATU O PEPA

Na tolaulauina e le Failautusi le faasologa o le Tuuina atu o Pepa e tusa ai ma T.T.49(2).

1. P.P.2020/2021 Nu.136, Lipoti Faaletausaga a le Ofisa o le Komesina o Sulufaiga 2019/2020.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2020/2021 Nu.123, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2019/2020 Nu.112, Lipoti a le Pule ma Suetusi Sili i le Faatinoga o Galuega a le Ofisa Suetusi Tausaga Faaletupe 2018/2019.
2. P.P.2020/2021 Nu.124, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga faale-Faavae i le P.P.2019/2020 Nu.113, Lipoti a le Ofisa o Pule ma Suetusi Sili i Tulaga Faaletonu Tausaga Faaletupe 2018/2019.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga i luga o le faitauga faalua – Aso 21

FOFOGA FETALAI: E tolopo Galuega a le Fono Aoao i le aso Fono ananafi o lo o saunoa le sui usufono mai le itumalo faaalaalafaga o Alataua

Sisifo, o le Afioga foi lea i le Taitaifono o le Komiti o Tupe Maua ma Tupe Totogi a le Palemene.

Ia, ou te tapa ma le faaaloalo lau Afioga i le Taitaifono o le Komiti o Tupe Maua ma Tupe Totogi e te tulai mai e faaauau lau saunoaga. Ou te manatu foi e le o toe tele nisi o mea e fia oo i ai le saunoaga a lau Afioga.

Afioga ALIIMALEMANU ALOFA TUUAU (Alataua Sisifo): E faatalofa atu i lau Afioga i le Fofoga Fetalai i lenei taeao fou faapea sui usufono mamalu o lenei Palemene, e le gata foi i lea o Ofisa Sili o Pulega o Matagaluega ma Faalapotopotoga, o auunaga eseese ua mafai ona tatou mafuta, aemaise lava le faafofoga tapuai mai a Samoa.

O lea ua maea ona e momoli le viiga ma le faafetai i le Atua ona o le matagofie o lenei aso, ua faapena foi ona faatagisia ai le faatasi mai o le tatou Tapaau Sili e tapasaina le galuega o lenei aso.

Sa gata mai se matou tala i le tolaulauina o tupe maua mai totonu o le tatou atunuu faapea foi ma tupe faameaalofa mai a tatou paaga mo le Paeaiga lenei. Ma o tupe maua i totonu o le tatou atunuu i le 2016/2017 e \$578 miliona na faatatauina., 2018 e \$625 miliona, 2019 e \$626 miliona, 2020 e \$646 miliona ma le tausaga lenei 2020/2021 e \$593 miliona. Sa faapea foi ona i ai ma tupe faameaalofa mai paaga mo lenei Paeaiga, lea e \$242 miliona i le 2016/2017, oo mai i le 2018 ua \$256 miliona, 2019 ua \$223 miliona, 2020 e \$179 miliona ma le 2020/2021 e \$225 miliona.

Sa faamamafa i se tala, o le faamatuu mai o nei fesoasoani po o tupe faameaalofa ona o le talitonuina o faiga faavae a le Malo ua faataoto e taiala ai le faatinoga o galuega, po o policies and processes, ma e ao ai lava ona mulimulitaia e tatou uma lava faiga faavae e amata mai ia i tatou o Taitai, e oo lava i le afaigaluega a le Malo ma pisinisi tumaoti ina ia tumau le talitonuina o tatou i tupe faameaalofa mai atunuu i fafo. O fesoasoani tau tupe la ia faameaalofa lea e aofia ai ma le Budget Support, lea sa fesiligia e se tasi o sui usufono le faamatalaina o le faaaogaina o le vaegatupe lea e taua o le Budget Support. Ma o le fesili sa tuuina mai, o ai e aumai ai, o ai o lo o patino i ai, e faapea e taua le manino o le Budget Support o lo o galueaiina ai le atinae, ae po o a foi ituaiga fesoasoani tuusao i totonu o le Tala Faatatau o le Tupe.

O le fesoasoani tuusao. Se i muamua atu le isi vaega lea. O fesoasoani tuusao, lea e matua manino lava le itulau faa-Roma 16, 15, amata mai i le 14, 15, 16 o le Tala Faatatau o le Tupe, lena e auiliilli atoa ai e na aumai ai i a tatou paaga ma poloketi taitasi o lo o faaaogaina o lo o faaalu i ai, faapea foi Matagaluega o e o lo o faatinoina ia galuega, lea e i ai le aofaiga lea e \$249,575,571.00 lea ua aofia ai le fesili lea o ai o lo o aumai ai o ai foi o lo o patino i ai, lena e matuai auiliili lelei i itulau na e tolu. Ia ona faapea mai lea po o ai lea e galueaiina, po o a tulaga o i ai le Budget Support lea e galueaiina ai le atinae. O le mea taua, o i i le Budget Support, o lea e i lalo o

le Matagaluega o Tupe, o latou na o lea e faafoefoeina le tulaga lea, lea la e i ai le \$126,000,284.00 o le Budget Support lena. A o la e faasoaso uma lava i Matagaluega uma.

O le auiliiliga i totonu atoa uma o le tusi lea ua leva ona aumai ia tatou, lena e auiliili uma ai lava Matagaluega taitasi lena e ave i ai, lea e i ai le vaega lea e ave i le EPC, i ai le vaega o lo o ave i le Ofisa o Aoga, i ai le vaega o lo o ave i le Suavai, e eseese uma lava. O i la i le Matagaluega o Tupe, e masani lava a omai, e i ai lava a latou forms po o aiaiga e aumai i i e atunuu ia po o donors ia e taua mai i i Ausetalia, le ADB, World Bank, Niu Sila. E i ai aiaiga na e tataua ona latou ausia ona aumai lea. O lea foi la e tapa lava e le Komiti Tupe ia ia faamaumauga pe a oo ina omai latou e faatalanoa le Tala o le Tupe, ma o i ina la e manino lelei ai Matagaluega uma lea e faasafua atu i ai le tupe lea e fesiligia ai. O lea e fai mai po o fea le mea o galueaiina ai o le atinae. Ou te talitonu, o galuega uma lava ia o lo o fai, e mo le galueaiina o le atinae.

O se faataitaiga o le Budget Support lea e ave i le Ofisa o Aoga, e fesootai uma lava galuega nei mo le atinaega o le atunuu. Afai e faaalu se vaega o le Budget Support mo le faalauteleina o le tomai o faiaoga, o le sao lena mo le atinae. Aua foi o le tele o le tomai e maua mai tupe ia na faaalu mai le Budget Support, e aumai toe faaoga e aoao ai isi pe faatino ai galuega mo le auaunaga masani, faapea ma le atinaeina o le atunuu. O le tuualalo, faamolemole lenei Maota, se i faavanoa lava sina taimi e faitau ai tapenaga o Tala Faatatau o Tupe. E tele taimi o Matagaluega, aemaise lava le Matagaluega o Tupe e tapena mai ai nei faamaumauga, ina ia manino faamaumauga ia mo a outou Afioga, aemaise foi lo outou tali atu i o tatou itumalo.

Lau Afioga i le Fofoga Fetalai, e le o aafia i Tala Faatatau o Tupe isi foi ituaiga fesoasoani lea e tuusao mai a tatou paaga, pei ona atagia i le igoa, lea e tau o le in-kind contributions, lena foi e auiliili lelei atu i ina i le itulau e 18 faa-Roma seia tau mai i le itulau 20 faa-Roma o le Tala Faatatau o le Tupe. O fesoasoani tuusao e pei lava ona taua, e leai ni vaegatupe e aumaia, e le tuuina foi la vaegatupe ia faatatauina i totonu o Tala Faatatau o Tupe aua e leai se tupe e aumaia ia tatou, ona e faatino sao pe totogi sao lava e tatou paaga mai fafo ia galuega.

O le Paeaiiga lenei lau Afioga i le Fofoga Fetalai, o tupe ia na faamatuu mai o fesoasoani ia tuusao pe totogi sao e paaga, e \$54.6 miliona le 2016/2017. Oo mai i le 2018 ua \$288 miliona. Oo mai i le 2019 e \$115.3 miliona, 2020 e \$77 miliona. Oo mai i le tausaga lenei 2020/2021, e \$135.5 miliona.

A o nisi o nei galuega tetele na ala mai ai ia fesoasoani tuusao mai paaga i lenei Paeaiiga, na ona ou fia lauina atu lava, o atinae ia e ova i le tai \$5 miliona ia sa ala mai ai fesoasoani tuusao ia. E i ai le poloketi mo le malosi faafouina, lea sa faatinoina e le EPC. Poloketi mo fesootaiga i lalo o le ogasami lea sa i ai le tatou Tui Cable, faatupe mai le World Bank. O uaea

tau fesoootaiga i lalo o ogasami, polokalame o le suavai, atinae mo le faamamaina o le suavai ma afioaga tulata i le taulaga, lea sa i ai le vaegatupe lea. O le Friendship Park. O le fausiaina ma le faalateleina o le atinae o le uafu mo le saogalemu. O le auala laupapa i Vaisigano. O le ports development project. O le fausiaina o le Ofisa Tutotonu mo le vaaiga o le suiga o le tau po o le Pacific Climate Change Centre. Samoa Tourism Growth Partnership. Polokalame faufautua mo vaega tumaoti o aoga. O le toe faaleleia o auala po o le economic and social programme faatupeina e Iapani. O le faatauina o le vaa fou lea i le va o Apia ma Tutuila. Polokalame sikolasipi, auala laupapa i Maliolio, auala laupapa i le Loto o Samasoni. Le aoga mo leoleo po o le Police Academy lea ua taofia le tumau i lenei taimi le faatinoina ona o le Koviti-19. Ae talitonu, e tele lava se aoga o lea foi poloketi mo le aotauina o Malu o le Malo, e le gata mo le saogalemu o le atunuu, aemaise lava lo tatou sao i le peace keeping missions a Malo Afaatasi. O nisi na o galuega tetele sa faatinoina e fesoasoani tuusao po o in-kind contributions i le Paeaiga lenei.

Lau Afioga i le Fofoga Fetalai, o le matau i manaoga o lenei Paeaiga, e lilifa lava i auala ma suavai, aua o manaoga ia e taatele i itumalo uma, e i ai manaoga e pei o taligalu, e i ai itumalo e manaomia, ae i ai foi itumalo e mauga e le manaomia ai ia ituaiga fesoasoani. O le i ai la o le Komiti Tupe i totonu o le Komiti o Atinae Tetele a le Malo, o avanoa ia sa asia ai ma faamaonia ai galuega tetele ia sa ou tolaulauina. Ona e ui lava o lo o totogi sao e ia galuega, e a tatou paaga, ae o loo manino lava le lisiina uma o ia meaalofa ma le tau e faaalu ai lea sa ou taua le vaega o le itulau o le Tala Faatatau o Tupe lea e i ai. O avanoa foi la ia o le Komiti lea i Atinae Tetele CDC, na molimauina ai e le Komiti Tupe vai ma auala sa faatinoina i lenei tausaga ma lenei foi Paeaiga, aemaise foi o Lipoti Faaletausaga e tuuina mai i le Palemene. O galuega faatino ia e faigofie lava ona fua ma iloa.

O le tulaga tau i le vai i le Paeaiga lenei...

FOFOGA FETALAI: Malie le sui usufono o lo o saunoa se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai se agaga e faalavelave ai i le saunoaga a le sui usufono a o lo o sausaunoa. Ae i ai itu taua e tatau foi ona ou fesoasoani atu e faalatele ai ona o le taua tele o le vaega lea o fesoasoani mai fafo, aemaise le tatou galuega e fai ina ia tulituliloa ai le faaogaina o seleni nei mai fafo.

O lea sa taua e le sui usufono fonotaga ia faifaipea a le Kapeneta e faa-tasi ona fai i le 2 masina, CDC po o le Cabinet Development Committee. O fonotaga ia, e taumafai ina ia mataitu le faagasologa o ia atinae ma ia atinae. E i ai uma lava la Matagaluega uma lava. E matua tumu le TATTE i Ofisa

Sili o Pulega ma latou Ofisa Sili Lagolago. E tumu uma i i le fonotaga lea ae faatalanoa nisi o poloketi ua filifilia mo le faatalanoaga. O faiga na a le Malo lenei ina ia lautele ai le galulue faatasi ma le malamalama o le isi Matagaluega i galuega o lo o fai a le isi Matagaluega. Ae amata le fonotaga lenei i le tolaulauina o le tulaga ua i ai le tamaoaiga o Samoa. E faatino la i le saunoaga manino a le Tamaitai Pule o le Faletupe Tutotonu. E amata ai i le fonotaga ina ia silafia e Minisita o le Kapeneta ma au, faapea foi ma nisi o Minisita Lagolago e mafai ona auai atu i le tele o latou tiute tauave o lo o feagai ma latou i a latou foi galuega faa-faipule, o le mataituina o Matagaluega ma latou lipoti o lo o avatu i faatinoga. Ia, o i la e faafogafoga lelei ai Ofisa Sili o Pulega i le tulaga lautele ua i ai le tamaoaiga o Samoa, po ua fia le mea ua i ai le nogatupe a Samoa. E fia le malosi o lo o i ai le tamaoaiga i le totogiina o aitalafu nei po o debt service ratio. O le a le tele o le tulaga o le tupe po o le tuuaofaiga o tupe maua a le atunuu atoa, lea e tau o le GDP, Gross Domestic Product. O le aofaiga lea, o le faaopoopoga atoa o ai o le Malo, faalapotopotoga o tagata taitoatasi. E i ai lava fua e fua ai, lea i le taimi nei e silia i le \$2 piliona le tupe maua a le atunuu atoa. Ona o i ina lea e malamalama ai i latou o e malamalama o lo o faafoea fuafuaga auiluma a le tatou Malo, Ofisa Sili o Pulega ia o Matagaluega, ma iloa ai le taaviliga lea e taavili ai tupe nei i totonu o le atunuu i le faatinoga. E aofia uma ai lava tupe a tagata taitoatasi, lea e matauina lelei e le Malo ma Ofisa Sili o Pulega o Matagaluega i le taimi lea e fono ai. Ia, ma le tulaga o tatou tupe maua e maua mai oloa ia e lau i fafo ma oloa ia e lau mai totonu. O le a le tele, o le a le eseese. O i ina e maua ai le surplus po o le deficit. O lona uiga o le faaopoopoga po o le pau o le tatou feafaatauaiga ona o le impact pe aafia ai faaputugatupe a le atunuu lenei, ina ia aua lava ne i lapelapea le sologa lelei o faatauga o oloa faatauina mai i le atunuu o lo o moomia oloa ia. Faatasi ai ma le malosi o le totogiina o aitalafu.

O i la, o mataupu lautetele ia lea e faataoto mai i le amataga o le fono e mataitu ai foi le sii i luga po o le pau i lalo o le tau o le soifuaga. Mea lautetele ia lea ua expose i ai Ofisa Sili o Pulega uma o Matagaluega ma latou soatau. E tasi lava le agaga o le Malo, ia malamalama, malamalama, malamalama i latou uma nei i le faafoega o le Malo, aua ne i i ai se mea e pogisa. O le malamalama o latou, latou te iloa ai foi i Matagaluega taitasi, e tofusao uma Matagaluega, aua o le faaiuga o a latou galuega lea e fua i le GDP, fua i le tuuaofaiga o tupe maua a le atunuu lea o lo o mulimulitai ma faamaumau e Matagaluega o Statistics Fuainumera, ma le Faletupe Tutotonu. E leai foi la se mea o nanaina, o lea e fai lava ma publish, faalauaitetele mai, ina ia iloa uma e le atunuu. O lona uiga, o tagata taitoatasi ma kamupani ma faletupe i totonu o le atunuu, o le mea lea ua agai i ai le Malo, i le maualuga ma le maualalo, le sologa lelei ma le tulaga faaletonu.

Lau Afioga i le Fofoga Fetalai, o faiga uma ia ina ia malamalama ai le aufaigaluega uma ma le Kapeneta, faatasi ai ma fono i le tai-lua masina, ma

mataupu auiliili o lea e talanoa ai. A uma la le folasaga a le Kovana, ona tapa loa lea e au o le Taitaifono o le folasaga a le Matagaluega o le Siosiomaga, ina ia malamalama ai le aufaigaluega a le Malo, o le mala pito maoae lea lea ua faafeagai nei ma le atunuu ina ia malamalama uma lava Ofisa Sili o Pulega, ona tolaulau mai loa lea o le tulaga lea ua i ai le tau, le tulaga lea ua i ai le vevela o le lalolagi. Sa le maua le ituaiga faiga lea i le tele o tausaga ua muamua atu. O lea la ua malamalama uma, ia ona faaiu ai lea i se upu mai le Taitaifono e ave ai le faamalosiua i Ofisa Sili o Pulega ma le latou galuega o lo o fai. O le isi la fautuaga a au ma le Kapeneta, tautuana ma outou, fai ma silasila i faitioga e aumai e latou e le o malamalama ma tali, tali e outou. Aua tou te faatalitali, a outou vaai atu loa o sau se faasilasilaga e le sao, nonofo outou ma tali, o outou na e i ai le tomai, le poto faatatau i mataupu o lo o laga. O lea la e i ai ma... e i ai lava le taimi tou te silasila ai ia ua interview mai lea, interview mai lea. Ae manatua foi la lau Afioa i le Fofoga Fetalai, e le o ni agelu foi Ofisa Sili o Pulega o Matagaluega, o isi foi tagata. Ae afai la e nofo le Nusipepa ma milomilo, milomilo ona sau lea o le ituaiga mea foi lele ua le tusia le tala, a ua tusi le tala ae momono mai ai foi ma o latou manatu, ua le avea o le mataupu na tautala mai ai le Ofisa Sili o Pulega, a ua opinionated. Ua tuu i ai ma a latou foi faaliliuga ina ia liliu le mataupu ma faauigasese, lea la e sese ai le tele o latou ia i fafo ona o lea foi ua aumai le latou... Ae faauiga e ai? E faauiga e reporters e le i aoga i mea ia ma le malamalama lau Afioa i le Fofoga Fetalai. Ona alu atu ai lava lea ma le sese lea i fafo, ma sese ai ma le toatele.

O le ala foi la lena e fautua ai, fai ma aumai mea ia e faaalu i pepa a le Malo ma le Pepa a le Palemene, le Savali ma le Pepa lea a le Palemene. Ina ia silafia ai e tagata le mea moni, aua na o le Malo e alu atu ai mea moni. A o le faalavelave lea o nisi o nusipepa, o lea latou te play ina le role o le Opposition. O lona uiga, o le tete mai i le Malo. A o mea ia e taua tele i fonotaga ia e taua nei, e iloa ai le tupe faaalu, le tupe faasili po o le tupe pau, ma le tulaga lautele o le afaina o le lalolagi i le siosiomaga, ma mea ia o lo o fai e tatou e avea ma o tatou sao e tuufaatasi ai gaoioiga a le lalolagi se i taumafai e foia. Foia le faafitauli lea ua faafeagai nei ma le lalolagi, ma le tulaga masani e avatu e le Malo. Ua iloa lelei lava le mafuaaga o mala ia ua faafeagai ma le lalolagi, ma e afua uma lava mala nei, o afa ma isi mau... o afi, o afi musaesae ua matua mu ai le tele o le afe ma afe o eka o atunuu ma faaleaga ai mea nei o lauu tetele ma le siosiomaga, ma atili afaina ai le ea lea tatou te manavaina, ma foliga mai ua tuuitiitia ai ma le okesene tatou te ola ai, a ua tele le kaponi lea ua taamilo i le lalolagi. Aua o le mu o le lauu, o lea foi ua matala ese ai le kaponi lea sa loka i totonu o le ogalaau. O ogalaau uma lava, o le kaponi lena e loka i totonu i ina, ma o le taimi e mu ai, release loa ma le kaponi i le vanimonimo ma atili ai ona faaletonu le ea lea tatou te manavaina ma afaina ai ma le tatou soifua.

O le ala foi la lena o lea e ala ai ona tatou liliu loa i le isi itu, o le puipuiga o le sami, ia aua foi ne i aafia le sami mai uiga tatou te faia e afaina ai i'a o le sami, e afaina ai meaola o le sami. A o le isi lea foi galuega o lo o fai e i'a o le sami, o le mitiia o le kaponi. O le ala lena e o lua ai mea ia. A tatou agai loa e fofo le faafitauli o le siosiomaga, e le gata tatou te vaai i le fofo, o le puipuiga o le siosiomaga ma tatou vaomatua. Ae faapena foi ona tatou puipua ma tatou ogasami. O le ala lea e ilitata ai tele le Matagaluega o lo o puipua le siosiomaga, i le mea lenei o le fai lapisi o tagata, aua o le mea e iu i ai, o le tafe atu i le sami, atoa ai ma le soona fana o le vao i le fagavao. Aua o le vailaau lea e tape ai le vao, e goto i lalo o le palapala, ma tafe atu ai i le sami le suavai. O mea ia e talanoa ai e le Komiti lenei, ona faaiu ai lea i se matou tatalo, ma faamanuia i le afaigaluega. Ina ia manatua e latou uma, o Matagaluega uma a le Malo, o Ofisa Sili o Pulega, faapea foi ma latou o lo o lagolago. O latou ia o faufautua a le tatou Malo, e faaee i o latou tauau le tele o nei galuega aua o Minisita ia e tietie i luga e alu atu ai le faatonuga, e alu atu ai le taiala, e alu atu ai le manatu faumalo. E aumai le poto i le faatinoga o galuega, faaopoopo atu i ai ma le vaai lautele a le Minisita. O lo o faataua foi le itu lea o le soifua o tagata i o tatou nuu, a faaiopoipo lelei loa mea ia e lua, ona maua loa lea o ni fuafuaga lelei. E taumafai e faamalie ai lo tatou atunuu, e le mafai ona faamalieina uma tagata. E i ai lava le manao i taimi uma taimi uma. Ma o lo o i ai foi suiga lau Afioga i le Fofoga Fetalai, a tatou agai i luma e sau pea suiga mai fafo. O suiga lelei ma suiga faale-lelei, ae o le Malo o lana matafaioi lea, ma le Palemene lenei o le fau o Tulafono, ina ia fuafua ai, suiga e talafeagai ma le teuteuga o Tulafono. Ona ua tupu le atunuu, tupu le faitauaofai, e manaomia ai atinae ina ia maua galuega mo tatou fanau. O atinae ia e taumafai le Malo e fau atu, ae taumafai isi e taomi i lalo e aua le faia. Ae a faapefea, o le a le mea e tua i ai a tatou fanau?

Lau Afioga i le Fofoga Fetalai, o le faiga la o le Fonotaga lea, o mafaufauga na fau mai i le 1975, o le talanoaga sa fai ma le IMF, latou foi o tagata atamamai na omai ina ia tuu mai o latou tauau e toe fau le tamaoiaiga o le tatou Malo ua matua bankrupt. O le mafuaaga tonu lena, o lea na fai ai fautuaga ia. Ae peitai e le i mulimulitaia i na vaitaimi ona e ese foi finagalo o na Faigamalo i na taimi. Ae ina ua tulai mai le HRPP, o lea ua ou lotolotoi ai i totonu, i fuafuaga fai sa matou galulue mai ai i le Matagaluega o le Tupe. O lea la ou te malamalama lelei i ai, e oo foi i fesuiaiga o tatou budget formats, na amata mai foi le suiga muamua i le 1975, faasolosolo mai ai i luma le faatulagaga o le tatou paketi. E mumua atu, e na o le 2 lava le faatulagaga sa i ai, o le capital and maintenance. E pau lava lena, o le faatulagaga, toe sui atoa mai i le 1975, tau tuu i ai ia le tulaga o le atinae. Ona toe fai foi lea o le isi suiga tele i le 1986, o le taimi lea o lea ua ou Minisita o Tupe. I le toe faatulagaga atoa o le budget format, ina ia atagia lelei ai ia atinae o lo o faatino.

Lau Afioga i le Fofoga Fetalai, e mao tua mao tua lava mea ia ou te talanoa atu ai, ae aoga tele leaga, mai tua lea e faatino pea. Ma o lea ou te nofonofo atu i i ma ou matauina le faagasologa o fuafuaga a le Malo. Na fau mai lava i tua i le 1975. Na faasolosolo mai ai i ina seia agai mai i le taimi lenei. Ina ua oo mai i le 1981 lau Afioga, 1979 seia oo mai i le 1981, na matauina ai le agai i lalo o le tamaoaiga. E matua maoae lava le tifa i lalo o le tamaoaiga. Aisea? Ona pei sa i ai le matamuli i le taitaiga o le Malo, e faatulaga lelei a latou alatupe. E pei o le mea sa fai i le taimi lena, e pei sa faamalie tagata, aua ne i faia ni sailigatupe a le Malo. O le 1977 na soloia ai foi ma le Tulafono, o lona uiga o le Tulafono na tauave mai lava i taimi o Siamani, sau i le taimi o Niu Sila, sau i le taimi o tatou 1962 seia tau mai i le 1977. Na soloia ai loa se isi vaega e le toe totogia a latou lafoga, le itupa lea o faifeau, na taofi ai lo latou sao i le atinae o lo tatou Malo. O lea la ua taumafai le Minisita o gafa tonu ma le taumafaiga e aoao mai seleni, ona ua tupu le tamaoaiga, ma ua manaomia uma lava i latou faisao i le atinae o Samoa. Ae a le togafitiga, ae a le faaaogaina o fanau, ae a le faaleleia o tatou auala?

Lau Afioga i le Fofoga Fetalai, o le agaga lena, o lea e i ai le Minisita ma le Matagaluega o Lafoga. Ma so o se Malo o le lalolagi, e oo lava i le Malo o Isaraelu, e taua tele mea ia. O le Malo o Isaraelu foi, e 2 a latou lafoga sa fai, o le lafoga e ave ia Kaisara i le Malo o Roma, ma le lafoga e ave e tausi ai ma faalelei ai le malumalu, e lua lafoga sa fai. O le ala lena na ala ai ona fetalai lo tatou Alii ina ua fesiligia, ave pea mea a Kaisara ia Kaisara, ave pea le lafoga a Kaisara ia Kaisara, ave pea le lafoga o mea tau le Atua i le Atua. Lau Afioga i le Fofoga Fetalai, o le faasologa maiga la i i le 1979 i le 1981, na matua le mafai loa ona taofia le mea ua tupu. Ua alu i lalo teugatupe lea e pei ona ou taua, e lua teugatupe taua. E mataituina e le Minisita ma le Matagaluega o Tupe, i so o se Malo. O teugatupe mo le faatinoga o ana galuega, o tupe lava a le atunuu ia, o tatou lava tala, ma teugatupe a isi atunuu, e afua mai i fefaatauiga. O le ala lena e uunai pea fefaatauiga. O tupe na e teu lelei mo le uunaia pea o le sologa lelei o tatou fefaatauiga. E faaletonu loa i ina, ona amata loa lea ona vaai i le tulaga lea, ua leai ni oloa e maua, leai ni sikareti. E fia vaiaso o e tutu e tau sue se pusaapa e tasi e ave i lou faleoloa. O lea e malamalama uma ai lava le augatupulaga mai le tausaga e 1979 i le 1981, lea na faaiu, taualuga i le solotetee a le Malo. Sa aafia uma ai lava le service. E tupu le mea lena, o lea ua ou faigaluega i totonu o le Matagaluega o le tupe. Ma ua amata ona ou mafaufau, e le o le lumanai lea o au, i totonu o le Malo, ua tatou ona ou mafaufau i se isi mea. O lea la e alu le solotetee, solotetee toeitiiti lava aso uma. Ona o le talosaga a le afaigaluega a le Malo, ina ia fia maua se siitaga i o latou totogi, ua leva ona le siia. A o a mea a sii ai? Ua leai se tupe. E aloaloesi lava le Malo mai le mea e tatau ona fai, o le sii o lafoga, sii tiute. O fea la na faatupe mai ai mea ia? Na faatupe mai loa e faletupe ia, ua sau sau le tupe, ua iu ina tau leai foi ni tupe o faletupe latou. Ma e i ai foi la ma

nogatupe sa faaigoa o le National Development Loan e aumai i tagata. O lea sa amata mai ai loa i ina, ua le toe faia ina ua tulai mai le HRPP, ona ua faatulaga loa e le HRPP le mea e tatau ona fai.

Lau Afioga i le Fofoga Fetalai, e le fia manatua lena taimi, e i ai tagata faigaluega a lo matou nuu, o au lea faatoa toe foi mai fafo. Ua na o se masina talu ona ou toe foi mai. Ou toe sau foi lea ou toe galue i totonu o le Matagaluega o Tupe, ae ou te i ua tutu nisi o tagata o le matou nuu, sa galulue i le Public Works, ua ta le 10. E o mai lava i totonu o lou ofisa, le Ofisa o le tupe, ma o latou ofu palapala. Ou fai atu, o fea a outou o i ai? “O matou lea e tafafao.” Aisea? “O lea matou te galulue lava, na ona matou usu atu e saina, ona matou toe o lea, aua e leai se mea e faia, e leai se.” E oo i laupapa ua taofi uma e mea nei o faleoloa, ua le talitonuina le Malo. Ia o a mea o le a totogi ai. Ua fia masina fia tausaga o faulai nei mea e le totogia. Ua leai foi se tupe a le Malo ia, o lea la sa ou aumai ai tala o le tupe, ma ou talanoa ai i totonu o le Maota lenei. A omai vaa suauu, taofi uma le foreign exchange e maua, ae ave se i totogi ai le uta lea. Ua gaogaonii faleoloa, e pau le freezer sa mafai ona maua ia ponaivi o moa, po o patuamoa, o lea sa lau mai. E pau ia o lapisi sa mafai ona aumai mai fafo, ma nai povi a le Esetete Tausi sa mafai ona aumai faatau, e na o le au faipine sa access i ai i mea faapena.

Lau Afioga i le Fofoga Fetalai, e matautia le mea na oo i ai le tatou atunuu. Ou te faia soo lava le tala lea. E alu atu le isi que taavale e utu le pamu i le pamu a le sosaiete a le au faitaavale, sa ou i ai. O lea la ua umi le que, ae te i lava ua tutu ai le tapaa maotua a le isi foi tagata maumea. O lea la ua pupusa, tilotilo mai le aufaigaluega, o pupusa atu le sikareti, taofi ai lava i ina ma le pamu. Ae o mai que i i, i le toeaina lea, se i aumai lava lau sikareti, sa faasau i le pepa. Se i aumai lava lau sikareti, se i matou, tau lava ina matou miti. Na faasolo atu lava i i, miti le isi, miti le isi, seia oo lava i tua i le aufaigaluega.

Lau Afioga i le Fofoga Fetalai, o mea ia, o tala ia lauiloa i lena taimi. E malamalama i ai matua o tagata ia ua tai 30 tai 40 tai 50 tausaga i le taimi lenei, sa feoi ma fanau nei ma savavali i le taulaga. Ua galo uma na mea, Lau Afioga i le Fofoga Fetalai, e tupu mea ia, ma tau fai, e 3 masina 1981, e 3 masina na fofo ai. Ona faatu loa lea o le Komisi, o le Komisi lena na avatu ai, le sa Palemia, i o i le Itu Agai, le Afioga ia Tofilau Eti Alesana faa-Taitaifono ai. O le a la le fofo na fai e le Tootoalii? Na teuteu Tulafono, o Tulafono o Tiute ma Lafoga. Se i maua mai se tupe e fai ai le pasene lea ua sii, se i faamalie ai le aufaigaluega a le Malo. O lona uiga, o lea e tu atu i i le Itu Agai o le HRPP, ae ua fa'i mai se i fautua le Malo i le mea e tatau ona fai. O lea la na mafai ai ona maua le seleni, ma le faamoemoe o le Malo i lena taimi. A pisa, ua toe 6 masina fai le palota, tuuai uma lava ia Tofilau, o ia e mafua ai ona sii tiute ma lafoga. O le a le mea na tupu? O lea ua fuifuilua nei mo le uluai taimi, o le Malo ma le Itu Agai. O le a le mea o le a fai e tagata? E le o galo mea ia, e le o galo. E ala ona taua ia te au le lauga a le sui, leaga o le mea tonu lava lena na ala ai ona sui finagalo o le atunuu, ma

aumai le HRPP i totonu. O le mea tonu lava lea, o le faaletonu o le tamaoaiga. Ua fiu tagata e oo i le isi faioloa o le matou nuu, ua ou te i i le fai mai ia te au. E a ea pe a e, faaaoga lou power o lena e te i totonu o le Matagaluega o le Tupe, se i e sue mai ai sau pusa apa eleni, ua atoa le vaiaso o ou i inei o tau sue. O le taimi lena a taunuu mai le vaa, e te le iloa po o fea na maua mai ai ia tupe e taufao. Na oti ai ma tagata i le taufaoga lea ua omia. Lau Afioga i le Fofoga Fetalai, o le tulaga lautele lena.

Na fai loa le faiga palota i le 1982, lea la na sao mai ai le HRPP i totonu. A o se tausaga aupito sili ona unstable ai le Faigamalo. E faa-fa ona sui le Faigamalo i le tausaga lea e tasi. O le 1982 ua manumalo le HRPP i le finagalo o tagata ua le lavava. Ona sui ai lea o le Faigamalo mai le Malo, tauave loa e Vaai, e na o Aperila, Me, Iuni, Iulai, Aokuso, Setema, e 5 masina ae toe aveese le Afioga ia Vaai i le faamasinoga na fai, na tuuaia ai Vaai. Ae sa i ai foi le matou masalosologa, o lo o i ai lima o le itu sa tu malo. O le 3 lena o Palemia, 3 fesuiaga Malo. E toe 2 aso o le tausaga 1982, 2 aso o Tesema, ae toe foi mai le HRPP i totonu, ona Palemia loa lea o le Tootooalii, ona ua le mafai ona toe participate, ua pau Vaai i le iuga a le Faamasinoga. E pei lea ona toe tofi ai loa lea o le Kapeneta atoa e Tofilau, le Kapeneta lea a Vaai. Ae tasi lava le avanoa lea e avanoa, le avanoa e tasi, ua avanoa ona ua pau Vaai, ona aumai loa lea o au ou faatumuina. Ia ona tuu mai ai loa lea e le Tootooalii ia te au, le galuega o le toe fix ina o le tatou tamaoaiga.

O le 1983, le tausaga na sosoo ai i le masina o Fepuari, na usu ai le Fono a le Palemene, aumai loa le uluai paketi. O le uluai tala o le tupe a le HRPP, uma le tala o le tupe i le amataga o le tausaga, ae alu le matou faigamalaga i Ueligitone, e aofia ai o au, o le Ofisa sili o Pulega o le Matagaluega o le Tupe, o le Ofisa sili o Pulega o le Matagaluega o le Va i Fafo ma le atinae. Na matou o i Ueligitone e faafeiloai uma lava ia High Commission ma Amapasa o Malo uma o lo o i ai i Ueligitone. E ave i ai le tala lelei, ia alofa ia toe tatala le avanoa ia toe faafoi mai le tou faatuatuaga i le Malo, ua leai se faatuatuaga. Ia toe tatala mai o outou faitotoa, e aofia ai ma le Malo o Niu Sila. E i ai le taimi na talanoa ai Tofilau ia Muldoon se i aumai se fesoasoani o lea ua sui le Malo. Na fai mai Muldoon o la e manatu Maldon o la e alu lava i le mea tuai. “Tofilau, e le fia avatua ni a matou tupe e faatau ai ni a outou sikareti.” O lea na matua oooo ai i le ooooga ia taulaga na osi ma talanoa ai le Tootooalii, “Samoa tatou ositaulaga, ia toe faafoi le talitonuina o le Malo lenei, e Malo tetele o le lalolagi.” Na fai si umi o ou i ai i Ueligitone, matou te feiloai ma latou uma lava o sui o Malo, e faatalitonuina ua sui le mea lea ua alu ai le Malo, o lea ua faataoto fuafuaga mamao mo le toe faaleleia o le tamaoaiga. Lele mai ai ma sui o le IMF, o le isi sa matua nofo lelei i Samoa, lea ou te aumaia i lau tusi, Mr Bundet, o le tagata aoaoina ua masani i mea ia, o le toe faufauina o se Malo ua matua pau mataga. Na uma le matou feiloaiga ma Amapasa o Malo ma High Commission, matou

o sao loa lea i Filipaina i le Fonotaga a le Asian Development Bank. Sa ma i ai i ina ma Tofilau, i le taimi lena o lea o lo o tauave pea e Tofilau le title o ia o le Minisita o Tupe, o au o le Minisita Lagolago. E aofia ai ma isi Ministries po o isi Matagaluega e 3, e aofia ai ma le atinae o lo o i lalo o lau vaavaaiga. E faapea foi ma Civil Aviation Economic Development. Ona ma o ai lea i o, o i la i le 1983, talu ai faaletonu na tutupu i lo tatou Malo, na ave ai ma le talosaga i le Pulega. E a pe a finagalo malie, e fai se faiga ina ia mafai ona ofi atu ai, fanau a Samoa, latou te galulue i ofisa o Pulega, ma mataitu galuega, mataitu a latou faiga faavae. Ina ia atiae ai Malo o lo o mativa i tagata atamamai, o lo o mativa i tupe.

O le 1983 na faatulai ai le talosaga lena, sa faapena foi ona ave i o i le IMF ma le World Bank. O lea la e afua ai, ona faatu mai le faiga faavae lea, o le tuu mai o le avanoa ia i tatou, tatala mai, e o ai tatou tama fanau. E galulue i totonu o Ofisa o Pulega o le ADB ma le IMF ma le World Bank. O le tausaga e 1973, ae ou te le i avea ma Minisita, o ou i ai pea i totonu o le Matagaluega o le Tupe, na maua ai lou avanoa ou te alu atu ai i o, i le aoaoga i tulaga o nonogatupe ma le atinae, i ina i le World Bank. E 4 masina na ou i ai, ma o i ai ma le matou aiga faatoa ma faaiipoipo, ia o le ma honeymoon lava lea. E 4 masina sa ma i ai i ina, faaiu i Korea. O aoaoga uma lava sa fai i le taimi lea, o le mataituina o nogatupe a atunuu, ma le faatulagaina o fua e fua ai le malosi o le atunuu, aemaise le taua o le mea lea o le Debt Service Capacity, a se atunuu. O le ala la lena, o i, o lea ou te talanoa atu i le 1973, ae ou te le i avea ma Minisita. Ou te Minisita ane la, ua lautele lou malamalama i feuaiga uma nei, aemaise matou feiloaiga foi sa fai a o galue i lalo, as a public servant, i feiloaiga ma latou, o high officials a le World bank ADB faapea foi ma si taimi puupuu na ou galue ai i Brussels. E talanoa uma ai lava vaega eseese ia, o lona uiga e tofi au e Tofilau, ua i ai si ou malamalama, si ou tamai malamalama i vaega eseese ia.

O le uma ai o le Fonotaga i le ADB i le masina o Aperila, na matou o ai loa ma officials a le Malo i fonotaga ia, ae sa fai i Sineva i le mea e tasi, round table discussions. Ou te oo atu ai i o, o i ai i ina i New York le high commission o Niu Sila, i le taimi lea e le o i ai se tatou sui. A o lea ua tauave e latou le tiute o le Amapasa o Niu Sila, o le Amapasa lava lena o Samoa. Ou te alu atu la i le airport o lo o faapena ona faatali mai ai au. Na amata ai lava ma matou Fonotaga, o lea ou te tau manatu, ua fai foi sina leva. E 3 vaiaso o faagasolo a matou Fonotaga, e tasi lava le mea, aumai la outou faatuatuaga, re-establish our credibility la outou confidence in the leadership of this country, under the wise guidance of Honourable Tofilau Eti Alesana, ma matou nei e lagolago. E fai lava si umi, na i vaiaso o matou i ai i ina. Na sosoo ai ma le Fonotaga na faia i Belgium, a le Fonotaga a Minisita a le ACB o lea foi ou te tauavea, ou te foi mai i Samoa, matou foi mai i le masina o Iuni, toesea i le masina o Aperila.

Ua ala ona ou taua mea ia, e le i faigofie le galuega tele sa feagai ma le vaega lenei Faaupufai. O lea la ou te tutu atu lava i i, e peiseai toe o au lea e totoe nei o le matou Kapeneta. O au lea e totoe i totonu o le Palemene, ae o lo o i tua pea ia le toa-lua sa matou galulue, o lo o soifua pea. O Jack Neztler ma le tulafale lea o Taua Latu Lome, e toe toa-tolu i matou, ma le Afioga ia Le Mamea ua galo ia te au Le Mamea, sa matou galulue faatasi, i le taimi lea e 3 tausaga mai le 1982 i le 1985, o le taimi o totoe. A o taimi uma ia sa faaoso ai uma atinae ia, o atinae o le Iunivesite ma le Faletupe Tutotonu, o le Central Bank. O mea tetele ia e lua, ua faataoto mai i le taimi lena, lau Afioga ona o le naunau o le Kapeneta, ia lava tama fanau aoaoina a Samoa, ma faataoto mai ai avanoa e galulue ai i Faalapotopotoga tetele nei a le lalolagi. Ina ia aua ne i toe o mai latou i fafo, o mai faavalea tatou. O lea foi la ua i ai sui o Faalapotopotoga lena i inei i Samoa, o tama fanau a Samoa. O lea ua lava ta oso, lau Afioga i le Fofoga Fetalai, lava ta oso lo tatou atunuu i tama fanau ua i ai le tomam, e mafai ai ona latou faafeagai ma i latou nei e omai mai fafo. A talanoa mai, o lea e talanoa mai e malamalama o tatou tagata.

O le ala foi la lena o lea e faataoto ai le polokalame, polokalame o atinae. Aisea? Aua foi le mea ia na fai mai ai i latou nei? Ou te manatua le taimi na ou alu atu ai i le 1973 i le polokalame lea sa ou taua, pei la o au na ou muamua. E fai le matou fiafia i le isi afiafi ae fai mai le pule o le Economic Development Institute i lena taimi, fai mai ia te au ma ata aua ua tau faasuaava, “Na o oe lava le tagata sa le tataua ona e i i.” Ou fai atu, aisea? Na umi le talanoaga. “Ia o le a e sau toe o ni nai masina ona fai lea o le faaiuga e faatoa talia ai Samoa e avea ai ma sui o le Faletupe o le Lalolagi, a o lea ua i totonu Samoa i le IMF?” A ua alu alu le talanoaga liliu le talanoaga, ona ua matou vaai atu, e fai si ou talavou. O lona uiga, e umi ona e aoga i lou Malo. Ia, ona matou talie lava lea, o mea o upu foi ia faasuaava. Ae faatoa ou te i ai foi i ina, toetiiti lava a ou misia le avanoa. Ia ona ou foi mai loa, ia amata faasolosolo atu loa le Afioga ia Pule sa i lalo o lau vaauga i le Matagaluega o le Tupe faasolosolo atu ai foi ma isi. E oo mai i le taimi lenei, ua fai si toatele o tatou tama fanau o lo o galulue nei i totonu o le atunuu ua foi mai i i ua lava taoso i le tapenaina o tatou fuafuaga mamao, fuafuaga mamao o ituaiga fuafuaga e matua aloaia e faletupe tetele o le lalolagi. E le i i ai ni fuafuaga foi lele e faaletonu. So o se fuafuaga faaletonu e tai pei o mea tufa fua, e oo lava i le tamaitiiti e le i aoga, e amata loa ona tautala gagana loa i le mea e maua fua.

Lau Afioga i le Fofoga Fetalai, o le taua lena o le mataupu lea ua aumai nei, o lea ua ou folaina atu le talafaasolopito o le toe lalaga mai o le tulaga na sao mai ai le HRPP i totonu. Ma o lea e manatua pea e le toatele, ona o le toatele ua tai 60 tai 70 o latou tausaga, o i latou ia e manatua pea, savavali i le ala, tete, fia aai. A o le a le upu na fai i le taimi lena? Ina ua ou alu ifo e fautua lau Minisita ae toe 2 aso ou tuua, na te le i iloa o le a ou tuua le Malo

ou te alu i le faiga palota. O lau fautuaga na ou fautua ai, “E sili ona aumai le mataupu e tagofia e au ma au ofisa, lea matou te iloa le fofo.” O le faalavelave, sa tatau ona lotea e le Matagaluega o le Tupe, ae sese le Matagaluega la e faia. Fai mai le tala a lau Minisita, “Malie Tuilaepa, ua uma ona fai le tonu a le Kapeneta, o le tagata Samoa, e fia ai loa, totolo mai loa i tuli ma see mai i le manava, se i tulou. O le mea lena a le tagata Samoa e fia ai, e totolo mai i le manava.” Na ou faanoanoa ai lava i le tala a lau Minisita, aua o le Loia e maua mea. Ia ona ou fai atu lea, pe e te le talia, ae o lena ua taoto atu lau fautuaga. Na ou avea le na pito atu ia te au fai ma molimau, o le Afioga ia Afoa Kolone Vaai. Na ou see ese loa i le 2 aso na sosoo ai ua ou faamavae ou te sau ou te alu i le palota ae tumau ai pea ma siisii ai lava lona tulaga ma avea ai ma Failautusi o le Tupe i le taimi tonu na ou Minisita ai.

Lau Afioga i le Fofoga Fetalai, e i ai talatuu o mea lelei uma, e i ai foi talatuu o mea leaga uma. A o le talitonuga faale-Historian, o i latou ia e faamaumauina mea tutupu i le olaga, fai ma tilotilo agai i tua, fai ma tilotilo agai i tua i le auala na e sau ai. A e malamalama i le auala na e sau ai, e laolao foi lou auala i le agai atu i le lumanai. Aisea? Leaga e tele le mau lesona o mea faaletonu na tutupu i aso ua tuanai e fai ma lesona mo le agai atu i le lumanai. E taua tele upu nei lau Afioga e fai ma taiala mo latou o lo o manatu e faigofie le mea lea o le taitaiga o se Malo. E le faigofie lau Afioga i le Fofoga Fetalai. E le faigofie. Ae ala ona taua ia i matou nei sa taumafai mai i le amataga, leaga o le iuga o se Malo faaletonu, e aafia ai a matou fanau, e aafia ai a matou fanau, e aafia ai a tou fanau. O le ala lena a malolosi ai upu e avatu i inei, e malolosi leaga o lea matou te fai ma tilotilo i tua, aua ne i toe tutupu mea ia na tutupu i tua, e aafia ai a matou fanau. Matou te le mananao i a matou fanau ua toe totolo mai i o latou tuli ma sesee mai o latou manava e taumafai e aoi mai ina ia faaleleia lo latou soifua. O lea e soifua mai tagata i aso nei sa matou galulue faatasi e molimauina au faamatalaga ia e fai atu. O le ala foi lena e le mafai ona ou talanoa i ni mea faaletonu, o lea ou te talanoa faa-Historian, faa-Historian.

E faamalulu foi ia i latou o lo o soifua pea ma faalogologo mai o ou taua mea ia. E tatau ona ou taua leaga a talanoa loa i talatuu a le atunuu, e te le talanoa i ni mea faaufiufi, e tatau ona e talanoa i le gagana tuusao ma tau sao mea na tutupu. O lau meaalofoa lena mo a tatou fanau o le taimi nei ma e lua. Ma o lea foi e te tautala, e te tautala i luga o le musumusuga lilo a le Agaga Paia, ia e galue mo isi, galue mo isi. Aisea? Leaga na aumai e le Atua le faataitaiga mo i tatou uma. O le a le faataitaiga? Na fanau mai Lona Alo, na fanau mai i le fale manu. O le matua mataga lava o nei mea, ae tau mai ai i ina le agaga o le Atua ia maua e tatou le loto maualalo. O lea o le a faai Lana galuega ae toe totolo i lalo, toe mulumulu vae o ona Au Soo, i latou ia o le a tuu i ai le talalelei, o Taitai o Ekalesia. Toe mulumulu. O le a le uiga o ia mea? Ia faapena ona outou ola i le alofa ma le loto maualalo. Aua tou te

fia taitai, a ia auauna. Aua tou te fia muamua a ia mulimuli. Ma aua tou te manao i oa. Ia manatua, na fanau mai lo outou Taitai i le mea mataga ma le maualalo.

Ia, o le fesoasoani atu lena e faamalamalama atili le mataupu i lenei taeao.

FOFOGA FETALAI: Malo. Ua malie le papa i galagala, ua usi ala savili foi le faafofoga a le Palemene aemaise foi o le faafofoga mai a le atunuu. Ua oooo lava le saunoaga a lau Afioga i le Palemia i le taimi foi a o matagitogaina le atunuu i futia ua sola ma tausaga ua alu. Ia, avea ia o se vaa faaafuagalu a o faafofoga mai ai Samoa mo lana filifiliga i le lumanai. Ia, e faapena. E filifili ma le tonu ae faapena foi ona filifili ma le alofa i le atunuu. A o le tatou galuega lena, tatou te omai i le Palemene lenei e fai tatou ma sui o itumalo taitasi tatou te filifili ma le tonu ma tatou galulue tatou te piama ma siioa faatasi aua se manuia o Samoa i lana tapuaiga. Aua e leai lava se isi o i tatou e manatu tatou te toe foi i tua i le olaga sa outou soifua ma ola mai ai i fatia ua sola. Ae aoga tele le saunoaga a le Palemia e faatupu manatu i lo tatou faamoemoe e limataitaiina ai le alualu i luma o upufai o Malo. Aua e tuu mai i luma e molimauiina le tulaga lea, pe a maitau i le oo mai. O tua atu e mamao tele mo i matou, ae o luma mai, o lea matou te molimauiina nisi o vaega tele o le saunoaga a le Palemia, e aoga mo le Taitaifono ma le Komiti o Tupe a le Palemene, e aoga foi mo tatou uma. Leaga sa faasolo mai e auga tuua mai le taimi o Tofilau, ia o le upu lena sa fai e le toeaina i le matou taimi, “Samoa, o maia tatou ositaulaga.” Ia o fea la o i ai le ositaulaga? A lea ua tulai mai. Ia, ua tatou tau le suea ni sikareti, ua tatou mamai i le tele o sikareti ma le tele o meaai ma le tele o vaemoa na o le patuamoa lava le mea sa maua i na aso.

Ia, e i ai le manatu, vavae foe o le saunoaga a le Taitai, se i tatou foi mai i le tatou malologa masani ona saunoa lea o le... faaauau le saunoaga a le Afioga i le Taitaifono o le Komiti o le Palemene, Komiti o Tupe Maua ma Tupe Totogi.

E faasilasila atu ua faataatiaese Galuega a le Fono Aoaofa o le Fono Aoaofa mo lana malologa masani. Faafetai.

Na faataatiaese Taulumaga a le Fono Aoaofa o le Fono Aoaofa i le itula e 10:35 i le taeao ma toe faaauau i le itula e 11:3 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe (Nu.1) 2020/2021.

FOFOGA FETALAI: Ou te faasilasila atu ua toe amatalia Tausalumaga ma Galuega a le Fono Aoaofaitulafono.

E faia le malologa ua faapena ona maea le saunoaga matagofie a le Afioga i le Taitai o le Malo. Ma ou te tapa ma le faaaloalo lau Afioga i le Taitaifono o le Komiti o Tupe e tulai mai e...

Ia, malie lau Afioga i le Taitaifono se i tuu atu le avanoa i le Minisita o lo o tulai mai o Afamasaga Toeolesulusulu...

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Faafetai i lau Afioga mo le avanoa. Faafetai foi, ou te manatu o lea ua maea le taumafaga ti ma ua matu foi i fau le talisuga foi a lau Afioga ma le mamalu o le Maota. Ae ua ou tulai atu ma le faaaloalo e faafetai atu i le lauga matagofie a le Afioga a le Palemia, ma o lo o vilivili mai ma text mai le itumalo i le taua o le toe tepa i tua ina ia o tatou talisapaia ai le taimi lenei ua tatou i ai, le upu palagi foi lea e fai mai ai toeaiina i tua o le appreciates, i le taimi lenei ua i ai le tatou tamaoaiga ma le taua o le talafaasolopito lau Afioga.

Ae paga lea, ua lagona lava le faanoanoa i lenei taeao, ona o le tele o mataupu nei e lagalaga i le tala faasolopito, le Afioga i le Palemia ma le saunoaga a le Afioga i le Taitaifono. O mataupu sa laga e le Afioga i le Vaega lea e tatou te le o faatasi ai. Aua o le tele o mataupu sa laga e le Afioga ia Fiamē, ia ma mataupu foi na laga e le Afioga ia Laauli. Ia, a o lea ua le nonofo mai se i malamalama lelei i mataupu nei lau Afioga, aua o le isi lava lea mataupu pito i sili ona taua lea na oo i ai saunoaga a le Afioga i le Taitaifono, o le mataupu lea e o nei ma talai o le siitia o le totogi mauualalo, le minimum wage. Lea fai mai a omai o le a sii i le \$1. Ia, na ou alu la ma talatalanoa ma se tasi o faipisinisi foi, tamalii ua loa lana tautua i le atunuu, e ova i le 200 tagata faigaluega na te faafaigalueina. Na ma talatalanoa la i le mea lea. Ia, na ou fesili i ai, o le a le tulaga e i ai le 200 o lau aufaigaluega i le tulaga lea i lau pisinisi pe a faapea e sii la i le \$1 mai le \$3 lea e i ai nei i le \$4? O lana tala, a fua i le 200 o lana aufaigaluega i le itula, ia o lona uiga ua siitia i le 200 lana tupe alu. Fuafua i le 40 itula i le vaiaso, e \$8,000 lana tupe faaopoopo. A fuafua i le 52 vaiaso o le tausaga, o lona uiga e \$416,000 lana tupe lea o le a faaopoopo e manaomia ina ia maua ai le mea lea o le faaopoopoga o le \$1 lea. O lona uiga toeitiiti lava afa miliona le tupe faaopoopo e manaomia e le kamupani. Ia ona ou fesili lea, e faapefea la ona e foia le mea lea? Fai mai, e tasi lava le tali o le mea lea, o le faamalolo o le isi toa-selau, faamalolo le isi toa-selau o le aufaigaluega, a ua lava la, pe na o se toa-selau e faigaluega. Aua o se upu i lou tago e sii le tau o oloa ina ia mafai ai le mea lea, ia, e le iloa pe faapefea ona toe faatau tagata i lau supamaketi.

Ia, e pei o le mea lea lau Afioga, aua o lea na tatou faalogologo ananafi i le mea lea o le literacy rate i le mauualalo. A o lea foi la ua iloa atu, se o le

numerically illiterate. O lona uiga, e matua tele le faaletonu o le faaopoopo lea e i i, ia o la e sili atu ai faaopoopo a nai toeiina la e i tua la e latou te fai mai, sole, ou te le iloa pe faapefea ona totogi nei mea.

Ae pei ua ou tulai atu lau Afioga ma le faaaloalo, se ta te faanoanoa, e pei ua le amanaia lau Afioga ma le mamalu o le Fonousu lenei a Samoa. Ia lea ua 3 aso sosoo, faaopoopo i ai ma le Aso Faraile ma le Aso Tofi o le la vaiaso. Se ua ta le malamalama la po ua i ai se isi tulaga ua tataua ona see i ai lau Afioga ma le Palemene. Ia pei o lou tulai atu lea ma le faaaloalo. Faafetai.

FOFOGA FETALAI: Ia, se i tulai mai... leaga o lea tulai mai le uipi a le... po o le susuga foi i le sui usufono mamalu mo Anoamaa Sasae.

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa Sasae): Faafetai mo le avanoa i lau Afioga i le Fofoga Fetalai.

FOFOGA FETALAI: A o faafofoga mai le itumalo i te i ua molia se faaaliga a le Fofoga Fetalai. O le whip pei o le tulaga tofi lea e faamaopoopoa se vaega, po o le Palemene e fesoasoani i le galuega a le Fofoga Fetalai ma le Sui Fofoga Fetalai. Tulai mai lau Afioga.

Afioga Alaiasa Muagututi'a Moefaauouo Malagaitutogiai Sepulona Moananu: Faafetai faaeaea i lau Afioga, o lea o le a uma le Paeauga a o lea faatoa e saunoa i mea ia. Faafetai i lau Afioga i le Fofoga Fetalai. E le uma le agaga fiafia ona o le saunoaga sa faataatia nei i le taeao i le Maota. Ma ou te fia faatu foi se lafo e faataatia le saunoaga lea i le Maota. E i ai le tala foi lea a le Tusi Paia i le Tusi a Paulo ia Korinito, fai mai o tatou o le nanamu o le Atua i e faaolaina ma e malaia. Ioe. O le manogi o le ola e oo ai le ola i tagata. O le manogi o le oti, e oo ai le oti i tagata. O lenei la taeao, se ua ta lagona le ola i lata faalogologo atu i le toe auiliiliga o nei mea, leaga e tofu lava tatou ma talaaga o le vaitaimi lea. Tausaaaga e 1980, 1981, 1978 na ou faigaluega ai i le Malo. Na o le 6 lava masina na ou faigaluega ai i le Malo lau Afioga i le Ofisa o le Palemia ae sue lau galuega i le private sector. Leaga foi e fai lava si maualuga o le mea sa i ai totogi o le private sector nai lo le Malo. Tasi lena mea uiga ese lea ua tatou tulai mai i le vaitaimi lenei, ua toe saili galuega uma mai tagata i le Malo. Aisea? O faiga faavae a le Malo lea ua i ai i le siitiaga o totogi o le aufaigaluega. Ioe. A tatou talanoa la i mea ia, e le malamalama ai le vaega lea tai 30, tai 20+ tausaga, ae leaga o le aoaoga lea a tatou lea e fai i a tatou fanau e pei ona saunoa le Afioga i le Palemia, e ala ona tatou faia nei mea, tatou te le mananao i a tatou fanau e toe ui mai ai i mea ia.

Ia, lau Afioga, e pei na pau lea o si mea sa fia faamanino atili, o le eseesega lea ua i ai o le naunau o tagata e o e faigaluega ma tautua i le Malo. E i ai isi

saunoaga ananafi i nai a tatou overseas supporters lea a le HRPP, o la e ua faafofoga mai latou, o le agaga lava ia o le toaina, ia fai malu outou faiva, fai malu outou faiva. Aua tou te popole mai i le tatou Vaega Faaupufai, ae aua ne i avea nei mea ma mea o le a vevesi ai fua lo tatou atunuu, leaga e tele nai o tatou tau aiga o la e fai lava foi si a latou fiafia i o i atunuu mamao.

Ia o le matou tala lea ma le agaga faaaloalo. Ia manuia tele le faaauauina o le lauga a le Taitaifono. Ma le agaga faaaloalo.

FOFOGA FETALAI: Ia, se i tulai mai le Afioga i le sui usufono mo Palauli le Falefa, lau Afioga Faumuina Tiatia Liuga.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga i le Fofoga Fetalai. Leai, o lea sa taua e le Afioga i le sui usufono mamalu faatoa maea atu nei, o le tasi lea o galuega sa ou faia a o ou i le Malo Afaatasi o le collect ina o mea o datas o scales a lea employer ma lea employer. Ou te iloa out of so many countries, na pau leni o le atunuu o lea e avea le Malo o se tasi o comparators e construct ai le totogi o tagata faigaluega a Malo afaatasi o Samoa. O le faamaoniga lena o lea e maualuga ma lelei le level lea ua i ai totogi o le afaigaluega a le Malo. Ma lou faaaloalo lava.

FOFOGA FETALAI: Malo faafetai. Ia, se i toe tulai mai lava le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e i ai nai vaega ia lea ua toe lagalaga e ao pea ona oo i ai se manatu. O le amata atu i le uipi. O le uipi, e sau mai le upu faa-Peretania o le whip, i totonu o tulaga ia faa-upufai. E tofia le tagata e pei ona e saunoa e faamaopopo mai tatou o faipule. Mo sina faataitaiga afai e alu alu alu ua le lava le numera, o ia e... i le vaega ia a le HRPP ia, aua e i ai foi whip a latou la ia e tetee mai i le Malo. O lana galuega la, e alu atu i fafo e vaavaai po o ai le vaega lea o lo o taumafa a latou tapaa, e alu atu la i le leo lea pei o se sasa e matua sasa mai ai i totonu ma otegia faipule, ona pei ai lava lea o faipule o sana fanau. O le ala foi la lena e i ai taimi e itagia ai, e faapena. A alu alu alu telefoni, e oo lava ina telefoni i le fale, o a au mea na e fai ae le sau i i i le Fono? Ia, ae le mafai la e se isi Itu, pe afai e manao foi le whip o le isi Itu e tetee aumai ni a latou faanoi o la e mamai ae le mamai, a o la e foi e o latou e tafafao. Ia, o le tulaga lena e faamanino ai le itu lea. E taua tele le tulaga lea o le faamaopoopoina o le galuega a faipule.

Ae le itu taua lau Afioga ua ou toe tulai atu ai, o le itu lea sa ou taua muamua e faamalamalama atili, o Tulafono sili ia i le itu o le faagaoioiga ma le pulega o Malo, faagaoioiga ma le pulega o Faalapotopotoga. O le a lava le Faalapotopotoga, po o Faalapotopotoga o Taaloga po o se Ekalesia. E 2 lava

taiala e limataitaiina uma ai lava Faalapotopotoga e aofia ai foi ma le Malo lea sa ou tautala ai. Ia manino mea uma aua ne i i ai se mea faa-alatua, faa-alualua. O le tulaga lena lea e ala ai mo se faataitaiga, e ala ai ona fai nei mea o tauofoga. E ala ai ona a oo i se Faamasinoga, e i ai se conflict of interest po o, e i ai se mataupu e ono fesiligia ai le amiotonu a le Faamasino, faamavae e alu ese aua na te faia se Faamasinoga. O le ala foi lena e ala ai ona tapena Lipoti ma aumai a Matagaluega ma Faalapotopotoga e aumai i le Palemene, ina ia silafia ai e le Palemene lenei galuega o lo o fai, e maua ai lava i i ma le ova foi a le isi Matagaluega po o le Ofisa Sili foi o Pulega o le Matagaluega. O le itu la lena e taua tele ai le upu lea o le transparency, ia malamalama mea uma ma le manino o lipoti, aua ne i i ai se mea e faalafi.

Ia ma le vaega 2 o le accountability, ia maioio lelei foi ma manino le faatinoga o auala, lea sa saunoa manino i ai le Taitaifono o le Komiti o Tupe, ona o lea e lautele mai foi lana saunoaga. A o le ala lea ou te toe tulai atu ai, e toe faaopoopo atili le taua o le mataupu lea na ia aumaia. O le manino, aua ne i i ai se tulaga e ono le manino ai le faatinoga o galuega o le a fai, po o galuega ua fai. A manino lava faamatalaga o le Faalapotopotoga e fai e lea tagata ma lea tagata, e iloa gofie ai foi i ina se galuega o lo o lelei faatino. E iloa gofie ai foi i ina le aufaigaluega o lo o faamaoni. E iloa gofie ai foi i ina le aufaigaluega e le faamaoni, ia ma fai loa i ai faaiuga. Faaiuga o le tagata e faamaoni, sii lona tulaga toe faaauau lana konekarate, ia po o na pau lava ua sili atu foi, o la e faamaoni, ae faamaoni foi le tagata o lo o talosaga ae maua ane, pei e tau manifi teisi atu le maualuga teisi ae lava o le silafia o le galuega ma le poto masani. Ia, o le ala lena e fai ma fesuisuia ai tofiga. O le tele lava o Ofisa Sili o Pulega o Matagaluega ua i ai nei, e laititi lava le eseese, e matua manifi, raisably difference, e tai pei lava o le manifi o le matatafi le manifi o le faaiuga mai le isi Pule o le Matagaluega i le isi suiga lea ua fai. E matua manifi lava le eseese ona e maualuga tele le aoaoina o tatou tama fanau e faauluulu i ai Matagaluega, e matua fai le tauvaga. E le gata la o le Pule Sili, a o le Pule Lua, Pule Tolu, Pule Fa. E i ai le Komiti latou te faatalanoaina ona faatulaga loa lea, aumai loa i totonu o le Kapeneta ona fai ai lea o le faaiuga.

Aua e taua tele le mea lea lau Afioga, ona o le tala lea e feaveai i tua e faasese ai, o Tuilaepa e faia uma lava tofiga. Ou te le faia ni tofiga lau Afioga. E i ai le panel, e i ai le Komiti latou te faia. Ua faafia ona ou faamatalaina lea mea e faasalalau tofiga, tusi talosaga i ai tagata, e ese le Komiti latou te faia faatalanoaga, ona faatoa aumai ai lea o le fautuaga i totonu o le Kapeneta. Po o le 99% o fautuaga e aumai e sao. Ae i ai lava se fautuaga, e tolaititi lava tagata e aumai e tele atu le iloa e le Kapeneta. Ia manatua foi e 13 le aofai o Minisita ia e i ai e aofia ai ma le Palemia, ae toa-3 le Komiti lea e faia le suesuega. A o le 13 lea e saofafai i totonu o le Kapeneta, o lo o i ai i latou ua leva ona faauluulu i ai Matagaluega po o Ofisa Sinia o Matagaluega po o Pule o Kamupani ua foi mai ai i mea ia o le

faatanoaga o mea nei o tofiga ma latou silafia ai tagata e agavaa ma tulaga uma faapena e tatau ai ona tofi. O lea la ua ou faamatala aloaia atu i i, leaga o talaiga na o la e fai. Tou te iloa e fai uma lava e Tuilaepa. E le mafai e se tagata soifua ona fai ia mea. Tou te iloa ea ua leai se aoga o le Kapeneta, ua leai se aoga o Ofisa Sili o Pulega o Matagaluega. O le tau faaleaga na o lea e fai nei lava, o lea e fai nei e le vaega lea. O le ala lea e ala ai ona toe foi i tua lau tautalaga, e faamatalatala ai galuega ia e fai e le Kapeneta, ma le tele o faiga faavae ia e i ai nei. A o le mea sili ona ou faanoanoa ai, ae alu atu, alu atu o le tagata sa i totonu o le Kapeneta, e tatau ona talanoa mai po o a la ni au mea piopio na fai. Ae le o i ai lava ma se faamatalaga o aumai. O a la ni au mea piopio sa fai ma ou faatonu ai le Kapeneta e fai?

Lau Afioga i le Fofoga Fetalai, e fiu lava le tagata e faufau, e le mafai ona taunuu se taunuuga lelei. E leaga ua tatou iloa uma lava tagata faufau, tagata faufau e iu lava ina tautau i le laau lea na tautau ai Hamanu, o le laau na faufau e Haman na iu lava ina toe tautau ai. Lau Afioga i le Fofoga Fetalai, o lo o agai le saunoaga a le sui e faatatau i le Tala Autu o le Tupe, ma le Tala Faaopopo, a o lea sa e talanoa mai foi i le tusi la lenei. Vaai i le tele o le tusi, o lea e aumai ai le Tala Autu faaopopo, e le o le Tala Autu o lo o faagasolo nei, o lea la e ese ai ma le Tala Faaopopo lea o le a agai atu i ai le tatou Palemene. E talanoa auiliili, i le taimi e maea ai ia saunoaga faalauaitete ma faamalamalamaga a le Kapeneta. O le a la mea ia e aumai i i i totonu i i i le Tala Autu lea e saunoa mai i ai lea faatoa uma nei ona saunoa i ai le Taitaifono? Ua matua manino lelei, auiliili mai ai ia vaegatupe fesoasoani o lo o aumai mai fafo.

O le itulau faa-Roma xiii, lea e aumai ai ia le auiliiliga, lea e aumai ai le tulaga o tatou fesoasoani ia mai fafo. E faamatala uma mai ai lava ma vaevae i lalo o le xviii ma le xix. Ia manatua foi, e ese fuainumera, tatou te alu i le faitau o fuainumera faa-Roma, tatou te alu i le faitau o numera faa-Arapi. I le taimi sa pulea ai le lalolagi e Roma, sa alu uma lava i le faitau faa-Roma, o le umi ia aemaise pe a oo atu i le afe, i le anoano o le mau ekisi ma le mau v. E te fiu e faitau, ia ma le tasi, le anoano o le mau ekisi ma le tasi, ma le mau v. E alu alu a e confuse ai, ua fenumiai lou mafaufau, o le aoga lena o le mea lea na tupu. O le tulai mai o tagata Arapi lea sa osofaia le lalolagi i na ona po. E sau faatasi ma le talaiga a le au Musalema, i le tausaga e 600 talu ona afio ae lo tatou Alii i le lagi. O le talaiga lea faa-Musalema, o le talaiga la faa-Musalema e lilifa i le feagaiga tuai. E uu le latou tusi paia i le lima tauagavale ae uu le pelu i le lima taumata. E oo mai loa ia te oe e te le talia pelu loa. O le ala lena na vave ai tele le latou osofaiga i Europa, pule atoia Europa e oo lava i Isaraelu. I le tausaga e lata i le 9 i le 10 seneturi, lea na lagaia ai loa e le lalolagi i na ona po, Peretania, Siamani o Italia, Sepania ma Potukale. O le lalolagi lena i na ona po, e i ai uma Ekalesia Kerisiano. O le taimi lena, e na o le tasi lava le Ekalesia Kerisiano, o le Ekalesia Aoa. E le i malepepe le Ekalesia, e tasi lava le Ekalesia. O lea sa lagaia ai loa ia

fitafita e o e tuli ese le au Arapi mai i totonu o Isaraelu, lea sa i ai taua ia o Crusades. O taimi tonu i i, o lea foi sa tau ai le tagata foi lea e tusa ai ma tala, faapea sa tau ai foi ma le tupu o Peretania, e foi atu le isi tupu ua tulei ese lona Nofaalii e lona uso. O mea na sa tutupu i na ona taimi. Ae o le meaalofo la a tagata Arapi na aumai i le lalolagi, o fuainumera ia faa-Arapi lea ua tatou alu ai nei.

Lau Afioga i le Fofoga Fetalai, o i la i le fuainumera faa-Roma i le xviii ma le xix, lea o lo o aumai manino ai fesoasoani mai fafo ma le faaogaina. O le a le mea lea e talai nei? Ua le iloa mea ia e aumai mai fafo po o fea o i ai, fesoasoani ia mai i ma i ma i, ma o, ma o, ma o, po o fea o i ai, po o fea ua ninimo i ai. A lea e aumai i totonu o le Tala o le Tupe. O le talaiga lena o lea e fai nei. Ae fai e tagata sa i totonu o le Kapeneta ma tilotilo i mea ia. A oo ina talanoa le paketi i totonu o le Palemene lenei, e masani lava ona ou fai atu, tilotilo i le itulau lea. O le itulau lea e auiliili mai ai le faaogaina o fesoasoani nei mai fafo, i lea Matagaluega ma lea Matagaluega.

Lau Afioga i le Fofoga Fetalai, ona ou see mai lea i le itulau lea 26 ma le 27. O le xxvi ma le xxvii, o lea e auiliili mai ai aitalafu, nogatupe, e leai se mea o nanaina. O nogatupe a lo tatou Malo, i lea faletupe ma lea Malo ma lea Malo. E manino, e manino lelei, transparency and accountability. O lea e faatino i i upu ia sa talanoa ai, a o lea e aumai manino i i, i le Tala lenei o le Tupe. Ona oo mai loa lea i le itulau lea 29, lea e aumai ai le tatou malosi e totogi ai aitalafu. E vaevae i vaega e 2, o tatou aitalafu i fafo, e aafia ai a tatou teugatupe, o teugatupe ia mo feafaatauaiga faava-o-Malo, foreign reserve array. O le ala lea o lea e vaevae ai ina ia silafia ai e tagata, e ese lava le taua o mea ia o tupe ia e totogi ai aitalafu i fafo. E leaga e aafia ai a tatou teugatupe lea, o teugatupe i isi atunuu i fafo. E tuu ese foi ma tatou nogatupe i totonu o le atunuu, e na o tatou lava tupe mai le isi teugatupe lea e pei ona ou taua e lua teugatupe. O ituaiga teugatupe a lo tatou atunuu, o teugatupe ia tatou lava tupe ma teugatupe o tupe a atunuu i fafo. O lea foi la e auiliili manino atu lava, ina ia aua ne i nunu le toau.

Ona oo mai loa lea i le itulau (i) ua amata loa lea ona auiliili mai le Tala o le tupe. Pe 3 i le 4 vaiaso o avatu le tala o le tupe lenei ia te outou, e aofia ai ma le vaega lea e le o nonofo mai. A o le a le mea lea e tupu? E oo ane lava i le taimi e talanoa ai, ave sese ia faamatalaga le malamalama. O fea o i ai tupe ia mai fafo? A o lea e avatu i totonu i i, manino, manino lelei. Ou te ofo i e sa saofafai i totonu o le Kapeneta. E mafai ona ou faapea o la e malamalama, ae mafai foi ona ou faapea atu, afai na matua aliali i i, i totonu o le Palemene lenei le saina pepelo o le igoa. E le taofia foi la le pepelo matuia i fafo atu o le Maota lenei ma tau fesili ai, “O fea ea le \$11 miliona lea e pisa soo ai.? O la e nana.” A o lea e i totonu i i, i le Tala o le tupe, lea e alu atu i lalo o le faletupe o le lalolagi. O lea e taua foi i le saunoaga a le Afioga i le Minisita. Ae o le a le upu lea e fai mai, e ese lava le faletupe o le

lalolagi, ese le mea lea matou te fai atu ai le IDA. A o le IDA o le faletupe a le lalolagi.

Lau Afioga i le Fofoga Fetalai, e le gata i le umi ona nofonofa ma le Tala o le tupe, avatu uma faamatalaga, ae le malamalama lava. Ua ou le iloa po o le lē malamalama po le le fia malamalama. Ma o lo o ala pea i lou mafaufau le lipoti mai a le isi tusitala, ua fai fai a latou suaga, ona faapea ane lea o le isi. Se malie ia, se i alofa maia ua le lava pepelo, ua le lava pepelo i luma o le atunuu. Lau Afioga i le Fofoga Fetalai, e pei o se mea faigofie foi lele ona fai le tala ae le mafai ona aveesea faamaumauga, leaga o faamaumauga o lea e avatu i luma o le Palemene, e na o mea moni, mea moni e tatau ona aumai i totonu i i. O le ala foi lena o lea e le nofono mai ai, aua e sau loa se mea e faaletonu, ona tutulai atu loa lea o le Kapeneta e aumai faamaoniga. Ona a lea? O lea na outou silasila foi i ai, aumai faamaoniga o le isi mataupu, ae maua ifo ai ma le anoano foi i isi mau solitulafono, o le lē totogia o tiute a le Malo i lena foi mataupu. O lea la e fiafia i ai latou e ave mataupu ia e fafo, e le mafai ona nofono mai ma fai i totonu i i, leaga na o mataupu moni e fai i totonu i i. Aua e sau loa se mea e faaletonu, tutu atu loa le Kapeneta, tapa faamaoniga, leaga na o mea e faamaonia e aumai i totonu o le Maota, a o mea faaletonu uma e fai i fafo atu o le Maota. Lau Afioga i le Fofoga Fetalai o le itu taua lena i le saunoaga a le Taitaifono. O lea ua sausi lava le saunoaga a le Taitaifono, auiliili, leaga o le auiliili lea e matua manino ai mea uma. A o le Taitaifono, o le Taitaifono a le Palemene leni, o ia o le watch dog, o ia o mata ma taliga se i tulou, o le Palemene leni, e sailiili manino ai, ia mea o lo o faatino e le Kapeneta ma le afaigaluega a le Malo.

FOFOGA FETALAI: Malo faafetai. O lea sa taua, ina ia faataatia i le Laulau-a-Fono le saunoaga a le Palemia. Ia o le saunoaga faamalamalama e le o se saunoaga faa-Minisita, o le saunoaga faamalamalama ma faapupula i mea o lo o faapena ma faamanino, ona sa laga mai e le Taitaifono o le Komiti o Tupe. Ma o le tulaga lena, o leni lava faamalamalama ua tele taimi o tuutuulima le vai o le Aliivaa i le tulaga o le faapupulaina o mataupu, e pei ona laga.

Ae manatua foi, e faamalulu atu i lau Afioga i le Palemia. Ia manatua foi le tala a Tofilau, tulou sala le gagana, i le taoto mai a le tuua i tiasa ae manatua pea. O le tagata e le fia malamalama ma le tagata e ita ia te oe. E tiga ona iloa o le lanu o le manupapalagi e mumu, ae o la lava e fai mai e lanu uliuli. E fiu lava e fai atu e sao o le manupapalagi e lanu enaena, ae fai mai lava e leai e lanu uliuli. E faapena uiga o le soifuaga leni tatou te i ai. Ma le tagata foi e ave i le vai e faainu ae le fia taumafa. O le a le mea o le a mafai i ai, e le fia malamalama, tulou i sala le gagana, o le upu e faamalamalama ai le galuega o lo o tatou faia na o tatou. Ae o lo o faapena ona aumai pea le tulaga o faitioga i le galuega o lo o faamalamalamaina e le Palemene. Ia tatou faamagalofa foi i ai i ia uso ma tulaga o lo o i ai. O ai uma

lava i latou o lo o faapena ona faitio mai i la tatou galuega, ia tatou galulue tatou aua se manuia o le atunuu. O la e faamasino mai le tatou Tama i le lagi, e ala foi i le faamasinoga, e auala mai ai lona finagalo, le faamasinoga a le atunuu.

E pei e faapena se lagona, ae i ai le manatu e faaauau le saunoaga a lau Afioga i le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai, e momoli atu le faafetai i le Taitai o le Malo, aua o le tala faasolopito atoa lena o le lauga lea na tau avatu ananafi. I le folauga mai a lenei Palemene i le 40 tausaga, lea la ua faalautele atoa lava. O au la lea sa avatu na o Tala o Tupe, ae o le talafaasolopito atoa lena, o le mea lea sa taumafai atu i ai le Alataua Sisifo. Ou te faafetai, ua vave ona fai le tatou malologa, ona sa lagona lava le mafatia, pe a mafaufau i le 1981, i le taimi o solotetee. Aua o le taimi lea, o la ua i ai le tamaititi. Ae tau fai o uma ma le toa-lua i le solotetee, ona maua lea ia o atu i tai i le eleele fou i le solotetee a le aufaigaluega a le Malo. Ona maua mai ai lea na o le tai \$4 i le vaiaso. O le lagona lena e oo mai pe a toe mafaufau i tua i le mea sa sau ai i le savaliga. Ae taua lenei taeao i le saunoaga, fai mai, a e malamalama i lou auala na e sau ai, e laolao foi lou lumanai. O lea o le a tau faauma atu le lauga a Alataua Sisifo. E oo mai le saunoaga a le Taitai o le Malo, ua oo se faamatalaga i galuega na faatino i lenei Paeaiga.

I le tulaga lea i mea tau vai, o lenei Paeaiga e 51 galuega tetele mo le faaooina atu o le vai i nisi o afioaga, mo le fausiaina lea o tanevai tetele ma le taiina o le alapaipa. Ma sa faaaluina ai se vaegatupe e \$71 miliona \$912, 000 sa faatupeina lava e lo tatou Malo faapea a tatou paaga.

O galuega tau le auala i lenei Paeaiga, na matauina ma le agaga faafetai lau Afioga i le Minisita ona ua faatofusia uma itumalo, ma si a latou foi auala sa faatupeina e le Malo faapea nisi o tatou paaga mai fafo. O le aofai o auala na faamaeaina e lenei Paeaiga, e 87. Ma o le vaegatupe sa faaalu ai, e \$90 miliona, \$205, 914. Lau Afioga i le Fofoga Fetalai, e le faigofie le tau atinaeina o le atunuu. E faigofie le faaleo o mafaufauga ma tuualalo, o faitioga, ae le faigofie le sueina mai o tupe e faatino ai. E manaomia e totoa loto ma alofa moni, e tapena le lumanai mo tupulaga fai mai.

Lau Afioga i le Fofoga Fetalai, o faamaumauga na ma nisi o galuega tetele, faaopoopo i ai ma le tele o Tulafono, aemaise lava Tulafono e 3 faatoa maea atu ona soalaupule ma pasiaina. O lea sa feagai ma le Minisita o Faamasinoga, ma le aufaigaluega aemaise le Komiti Faapitoa a le Palemene. Lau Afioga i le Fofoga Fetalai, o le sao lena o lenei Paeaiga. I le lalagaina faatasi o se lumanai manuia ma mausali mo Samoa. Ona ou manatua ai lea i lenei taimi le fetalaiga a le Atua, na apoapoai ai i Lona nuu. Fai mai, “A o oe Israelu e, a o oe Iakopo e, le na ou filifilia, na ou fai atu foi ia te oe, o oe lau auauna na ou filifilia, ou te le i lafoaina oe. Aua e te fefe! aua ou te ia te

oe, aua e te tepatepaai, aua o Au lou Atua, ou te fesoasoani ia te oe, ou te faamalosia oe, ou te taofia oe i lou lima taumatau e i ai le amiotonu.” Lau Afioga i le Fofoga Fetalai, o se lagona lena o lenei itumalo, e faapea foi ma le Komiti Tupe e afifi atu i le Afioga lea a le Atua i le Isaia 41.

E momoli atu ai le agaga faafetai i lau Afioga i le Palemia ma le Kapeneta, faamalo le onosai, malo le tauatai, malo le tautua atunuu. Ona faaii lea o se faamatalaga e fia fai i le aufaigaluega a le Malo ma Faalapotopotoga, e o lo o faatinoina uma lenei galuega. Aemaise o le tali mai i le Komiti Tupe, tainane le afifio o Minisita, ē o lo o taimua pe taiala i nei galuega uma. E ui lava e eseese Komiti faa-Palemene e lauliliuina a outou Lipoti faale-tausaga. Ae a oo loa i le Tala Faatatau o le Tupe ma faamatalaga o tupe, po o Actuals. Ona maua loa le avanoa o Matagaluega ma Faalapotopotoga uma a le Malo e feiloai ai ma Komiti Tupe. Sa lagona i le amataga o le galuega a le Komiti tupe le ote faamatua, le saua, e ala i le maualuga o matatia ma tapulaa, na faatulagaina atu, ina ia outou ausia. O luitau na luiina ai outou, ina ia siisii pea i luga le faatinoga o le galuega, aemaise lava o le mulimulitaia o faiga faavae ua uma ona faataatitia e le Tulafono o Pulega Tupe a le Malo 2001, Public Finance Management Act. E pei ona outou faafofoga mai i se tala na fai. O le tuuina mai o tupe mai a tatou paaga e fesoasoasni i le atinaeina o le atunuu. E fua le faatuatuaina o outou ma matou, tatou uma, i le mulimulitaia o faiga faavae. E pei ona saunoa foi le Taitai, ia manino mea uma ma manino le faatinoga o galuega, faafetai tele lava. Sa molimauina le vave o le tapena mai ma le tuuina mai o Lipoti faale-tausaga e pei ona faaleo atu ai le faafetai a le sui usufono Tamaitai o Gagaifomauga Nu 3. Ae o le fiafiaga sili, o le maea ona tapena o faamatalaga o tupe sa faaaogaina ma tupe na ao mai i auaunaga eseese po o actuals. Ma ua maea foi ona sueina e le Ofisa Suetusi. E faafetai tele i le Pule, le Suetusi Sili ma le aufaigaluega. E faapea foi le fesoasoani a Ofisa Suetusi Tumaoti, o e sa feagai ma nei galuega tele. O lea ua i totonu uma po o ua up to date ia Lipoti a Suetusi i le faaaogaina o tupe a le Malo.

O le faatuatuaga ma le taliaina o faamatalaga o tupe, e faamoemoe le talitonuina i lipoti a suetusi. O le taua lena o le galuega a le Pule ma Suetusi Sili ma lona ofisa. Ua le mafai ona lauina taitasi outou ma outou galuega na ausia, na molimauina e le Komiti o Tupe aemaise lava le mulimulitaia o faiga faavae. Ae o le itu mataina e le Komiti Tupe ina ua taufaaii lenei Paeaiga, o le lava o le silafia lena ua i ai i mea tau tupe ma le faaaogaina. O tupe faameaalofa e ala i poloketi, aemaise lava o aiaiga e tatau ona mulimulitaia. E le gata i lea o le tapenaina lelei o galuega e tatau ona faatinoina i tausaga taitasi. Ina ia ogatasi ma tupe ia e faamatuu atu, ma ia fesootai uma nei galuega i fuafuaga alualu mamao a le Malo, ua maea ona faatulaga i lea vaiitami ma lea vaiitami. O le taua foi lea o le galuega faufautua a le Kovana ma le Faletupe Tutotonu ina ia ogatasi uma a outou galuega, ma le mataituina o le tamaoaiga o le atunuu. O le lava tapena i

faatalanoaga ma le Komiti Tupe. E i ai lava isi taimi tou te fai faagogo mai ai, ae faaiu lava i le mautinoa o lo o manino le faatinoga o galuega, faafetai mo galuega lelei uma. E faafetai i le Ofisa Sili o Pulega o le Matagaluega o tupe, i le amataga o lenei Paeaiga sa matauina i nisi o mataupu sa laga i le lipoti a le Pule ma Suetusi Sili i tausaga ua tuanai, ina ia faaleleia. O le tuufaatasia lea o faamaumauga a le Matagaluega o tiute i totonu o faamaumauga a le Malo, po o le system lea e faaoga nei e le Malo, Finance 1. Ia aemaise lava ina ia maopoopo le faamauina o aseta uma a le Malo, e le faigofie, o le matua lavelave lava. A o le faafetai, o lea ua faatino. Ma e faafetai ai i la outou galuega fai faatasi ma le Ofisa o le Pule ma Suetusi Sili, ma le Matagaluega o tiute ma Tupe maua. O lea ua tino mai le faaleleia o mataupu ia sa laga.

E faapito lau tala lea o le a fai atu i le motu o Savaii, ona ou te taamilo soo ai. O le faafetai tele i le suiga i atinae o mea tau fale. E talitonu le tele o le fesoasoani a Faalapotopotoga o mea tau fale, e fesoasoani i aiga e vaivai tamaoiga. Ina ia lelei ma mautu mea e nonofo ai latou. E le o aafia i i, e e mafaia ma lelei tupe maua. O atinae foi ia e faatupe e le Faletupe o Atinae aemaise o polokalame ia sa faatino, e patino i tina ma tamaitai. E uunaia ai so latou sao i le atinaeina o le tamaoiga. I le lauliliuina o le Lipoti faale-tausaga a le Faletupe o Atinae, na maua ai le lelei tele o le totogi aitalafu a le au fai nonogatupe i Savaii. O nonogatupe ia e faamatuu atu e atinae ai aiga ma pisinisi mo le tamaoiga o le atunuu. O se agaga fiafia tele lea, ona a lelei le totogiina o aitalafu, ua lelei foi ona toe faataavale le tupe mo nisi atinae.

O faletalimalo. Faafetai i le Pulega o Tagata Tafafao Maimoa mai Fafu. E ui lava i se tulaga o lo o i ai nei, ae ua matauina lava pe a taamilo i Savaii ma ua faaopoopo foi nisi pisinisi fou. Aemaise foi o avanoa ua maua ai e nai tagata o le tatou atunuu, e ala lea i mo specials, ina ia faalauiloa ai pea o tatou faletalimalo. ma maua ai pea galuega mo nai tagata.

Ia aemaise foi le vaitaimi o le Kirisimasi, o lea sa matauina ai, e fai atu Christmas lights iinei, ae ua fai ane foi Christmas lights i o i Asau, faasolosolo mai agai i Salelologa. Ou te faafetai lava au ia i lene tofa na i ai, e fai laau kerisimasi i le vaitaimi o faamai. Atonu pe faitio nisi o tupe maumau, ae i sou vaivaiga, a fai o lea ua tatou faatalitali i le afio mai o le Keriso, o le pepe o le kerisimasi. O le a la le mea e toe tuu ai le fai mea lelei? Ia o le agaga faafetai, o le tulaga na i ai, ma ou te talitonu o le a faaauau pea. E i ai le talitonuga e oo atu ua aupito sili ona manaia lights a Savaii.

Ma e tatau pea ona ave le faafetai i ē e tatau na ave i ai le faafetai. A o ou i ai i Matagaluega a le Malo, e i ai isi mataupu laititi lea e fia talanoa i ai lau Afioga i le Fofoga Fetalai. Ou te faafetai i avanoa sikolasipi e aooga fua ai fanau i Matata Esee. O le talosaga, e a pe a faasafua, faaitumalo pe a faapea e au maka o tamaiti ma tulaga e manaomia ina ia agavaa ai i ia sikolasipi. E faapena foi i avanoa sikolasipi a le NUS. O lea pe ua ova i le 20 tausaga talu ona faatuina le tatou Iunivesite, e tele foi le aufaigaluega maua avanoa e

faalautele ai le avanoa, le capacity building a faiaoga, o se vaivaiga, pe le ua alagataua loa ona tatou mafau, e saili ni fesoasoani mai fafo, e upgrade ai le NUS, ma ave se vaega tele mo le building a le aufaigaluega a le NUS, ina ia siitia le auaunaga. O le auga o le manatu, ina ia mafai ona tali atu i ni avanoa mo le siisii pea i luga o le faitau aofai o le tatou atunuu, le growing population.

E ave pea avanoa i fanau e o ai i fafo mo specialised courses e le mafai ona aoaoina iinei. Ia atonu o le a faapea mai nisi, na uma loa ona outou aooga tou fai mai e tuu fanau iinei i Samoa. Leai, o le auga o le manatu, ia i ai avanoa mo le lautele o le atunuu ona ua tuputupu pea ia le faitau aofai o tagata. Mo se faataitaiga, o le Bachelor of Science Course, e talitonu lava e le na o fomai e manaomia courses ia. Ae ia maua ai foi ni avanoa mo isi. O lea e tatou te malamalama lelei lava, e na o fanau lava e maualuluga maka ma au i tulaga faasikolasipi, lea e ave i fafo. Ae o se manatu ia maua foi avanoa e i tatou iinei i Samoa, ona e le ma iloa pe tumau pea avanoa faasikolasipi e aumai e Ausetalia ma Niu Sila. Ua na o se tuualalo.

Ia, lau Afioga i le Fofoga Fetalai, e ui lava i se naunau, ae o le a foi Alataua i Sisifo. Ia ona ou tautala lea i le loto faafetai, loto ua faamalieina. Faafetai i lau Afioga i le Fofoga Fetalai mo le taitaiina o tatou Fonotaga, i lou lavapapale, ma le tofa sa faafoefoe ai le Maota lenei. O meaalofa lava ua faamanuia atu ai le Atua i lau Afioga. Ae le selu atu, aua o lau Afioga Leaupepe na tofi e le Tupu o Muagututia e te afio i Tapulaaia, ma Paia o Satuala. O le tatalo, ia agalelei le Alii i lou malolo manumalo mai upufai o Malo, faapea foi le faletua ma le aiga.

Lau Afioga i le Minisita Tuitama, lau Afioga Faasootauloa, lau Afioga foi Aeau, ia manuia le malolo manumalo mai i upufai o Malo. Ia lenei Itu tala o le Maota, lau Afioga i le Palemia ma Minisita o le Kapeneta, faapea foi Minisita Lagolago, e le faigofie la outou galuega. Aua sa fita ma tagutugutu le ala i luitau ma tofotofoga ae o le Atua lava ia le faavae papa, le na outou faamoemoe i ai, na fesoasoani atu, na mafai ai. Malo faafetai mo galuega lelei uma, faamalo tautua atunuu, faamalo saili malo. Tau ina agalelei le Atua i faamoemoega.

Ia liliu mai se tala i lenei Itu tala, i a outou Afioga i Taitaifono ma Sui Taitaifono ma sui usufono mamalu o Komiti Faa-Palemene, ia faamalo onosai i le tatou galuega, aua sa faamoemoe atu lenei Maota i outou aao ma faivaalofilima mo le faataunuuina o matafaioi aiaia a lenei Maota. Tau ina agalelei atu le Atua i lavasiga ma faamoemoega.

Momoli atu foi le faafetai i Ofisa Sili o Pulega o aufaigaluega o Matagaluega ma Faalapotopotoga a le Malo, faamalo i outou faiva tautua i le Malo o Samoa. Faafetai i a outou Afioga i sui usufono o le Komiti o Tupe, faafetai le lagolago, o le tele o lima e mama ai se avega.

Ona oo lea o se faafetai i le tapuaiga mamala a Samoa, mai i ona ao seia oo lava i le fanau, aua lau Afioga i Le Ao Mamalu o le Malo ma lau Masiofo,

faapea foi paia ma tulaga faalupe faaleaganuu a Samoa. Ae matua le tuu i faiva tatalo a le afaigaluega tatalo a le Atua, ma o latou faiva faanonomanu mo Samoa, ma agaga mo le Atua. A na le seanoa lau tapuaiga Samoa, e le manuia faiva o le Palemene.

Ona taumuli lea o se faamatalaga i si ou itumalo e pele i le loto. O le faafetai mo tatalo ma tapuaiga, ua ae manuia ai faiva o le auauna. Aua i taimi o le fememeai ma le lē mautonu, na maua le toa ma le mafanafana i la outou tapuaiga mana. Si ou nuu o Falelima, aua le nofo a ao faalupega i faafeagaiga ma outou faletua, Susuga ia Faapea Elia ma le faletua Tuiotemotu o le Ekalesia Metotisi, Susuga i le Epikopo ia Petivia Tuimaseve ma le faletua ia Sini, Ekalesia O le Au Paia o Aso e Gata ai. Le Susuga ia Peni Fepuleai ma le faletua ia Ioana o le Ekalesia Nasareta, Susuga Toeaina malolo manumalo ia Tupu Folasas ma le faletua ia Malo, o le paia lava lea aua le Afifio o Tapaau ma Nofo a Faalupea, Alaalatai lau Fetalaiga Folasas o le Fofoga o Papa, Alaalatai oulua Tamafaiga ma le Mamalu i le Alataua, faafetai tatalo ma tapuai. E lagona i le sautia i le sau lo outou alofa tatalo ma tapuai.

O si o matou nuu o Tufutafoe aua le Nofo a Aofaalupega i Faafeagaiga ma a outou faletua i fatafaitaulaga e 5 o le afioaga, Afio Gisa o le Tama o le Malo, o le Tama lava a Usoalii, Afifio le Paia o Leusoalii, Alaalatai lau Fetalaiga Momoemausu, le Lautinalaulelei ma le mamalu i Lealataua. Faafetai tatalo ma tapuai, e lagona le faamalumalu o luitau, lo outou alofa tatalo ma tapuai.

Si ou nuu o Neiafu, aua le nofo a Ao Faalupega ma outou faletua, le Susuga ia Maifea Asiata ma le faletua ia Fualole, o le Ekalesia Metotisi i Neiafu tai, Susuga ia Faafetai ma le faletua ia Saele, o le Ekalesia Metotisi i Letalie, faatalofa atu. Faatalofa atu foi i le Susuga ia Tisega Mariner ma le faletua ia Sivale, o le Ekalesia Metotisi i Matagilelei. Susuga i le Epikopo ia Uilisona ma le faletua ia Lagimaina o le Ekalesia ia Simamao Simamao.

O le paia lava lea aua le Afio o le Tama na faasau o le Alataua, o le Tapaau Tasi lau Afioaga o le Tonumaiepa o le Alataua, Afifio le Aiga Samoeleoi, o le Aiga na Faitatau, o le Aiga na au i Ao, o le Aiga na au i Papa, Susu le Aifaoga lau Afioaga Aliimalemanu ma le Toafa o Suafa ia Pei, Safiu, Lafaitale ma Aunei, Alaalatai laua Tama Igoa, Taatitimanaia ma Tuaiiaufai. Alaalatai le mamalu ia te oe le Faleauga ma nofo a Pule, ma Upu ia te Oe le Alataua.

Faafetai tatalo ma tapuai, e lagona le fesouaina ma tauau ina lafoaiina e le peau, lo outou alofa tatalo ma tapuai. O alofaaga foi na mo oe Alataua Sisifo, e oso le la, e gase foi eleele, ae e manatua lava i le loto oe si ou itumalo. Aua o ou siufanua ma vaipapa, na fofoa ae ai lou olaga ma lou tagata. Na mafai ai ona ola ma tupu, ma sausu i le moana ma le vasaloloa, ae o le teine lava o le eleele. O le iu o le fatu na toto, i eleele sa o le Alataua. O lea ua foupale le folauga i lenei Paeaiga, na outou finagalo ai ou te momoli maia la outou tofa paia i le Maota o Samoa. Ae ua malama ulugalulu i se vaivai ma se

naunau, e fia auauna mo oe le itumalo i lena Paeaiga, e mafua ai le faaoololomaau i le tofa paia o le tatou itumalo, e i ai le naunau ma augofie pea e auauna, e fai lou finagalo, ma o lo o maua pea le malosi i le faamanuia ma le fesoasoani mai o le Matai Sili.

O upu a le atunuu e poto lava le tautai ae sese lana atuiama. O le a se aga, se tala po o se upu ua le tautamalii i lau silasila ma lau faafofogaaga i le faagasologa o le auaunaga, ia malu e ave i fale ia outou finagalo, faamagalo se vaivai o la outou auauna. O a foi ni galuega ua le mafai ona talu atu ai i lena Paeaiga, e fai aso ma oso pea le la o le alofa matalasi faasoa mai o lo tatou Atua e leai ai se mea e tatou te atuatuvaile ai. Ae o lena foi se naunau, ina ia faatino galuega sa faamoemoe i ai mo le manuia o si o tatou itumalo faapea le atunuu aoao. O si ou manao lea pe a tusa ai ma sou finagalo.

Ae o le tatalo fai tumau, ia aua ne i liliuese fofoga o lo tatou Atua, mai i lo outou paia ma mamalu, ma ia felagiai ma pale pea Lona Suafa i le Viiga i lo outou soifua valaauina ma faaaogaina. Maua foi sou malosi e tautua ai le itumalo pele.

Lau Afioga i le Fofoga Fetalai, e fia fai ia se faafetai i nai ou aiga, o uo ma e pele i le loto, e le gata i totonu o si ou itumalo, ia ae faapea ai le salalau ai i Samoa nei ae faapea atunuu i fafo. Faafetai foi i le toalua ma le fanau, e lagona i le loto le mafanafana o a outou tatalo. Faafetai i le loto aiga, faafetai lagolago. E le galo i le faafetai le Susuga i le Toeaina malolo manumalo ia Tavita Anesone ma le faletua ia Lupe, ia faapea foi le Toeaina malolo manumalo ia Tavita Roma ma le faletua ia Tailua, faafetai mo tatalo ma le tapuaiga.

Ia lau Afioga i le Fofoga Fetalai ma lena Maota, faapea Samoa o faafogafoga tapuai mai, ia o le a se upu ua le taugamalie ma se aga ua faapaia fofoga, ia tofomalie ma utamalie, le seu tapuai a Samoa, mai e ua i ai tofiga a le Atua, ma Lana aufaigaluega tofofi, seia oo i le fuaga lalovaoa, tau ina ia agalelei le Atua, ma manutoipule le malaga a Samoa. O a ni mala o fou mai, tau ina ta ma faapoi ae folau i lagima le sa o Samoa.

Faamuli ma le ai le faafetai i Ofisa uma o lo o tautuaina le Palemene, ia aemaise ia lau Susuga i le Failautusi ma lou Ofisa o lo o tua i ai le Palemene. Lau Afioga i le Taitai o le Malo, ma le mamalu o le Vaega e Aiaia Aiatatau a Tagata le HRPP, a outou Afioga i Taitai o Itu Faatauagai, po o Vaega Faaupufai o lo o taupati mai, e saili malo ona o le fia auauna ma tautua i le atunuu. O le tuualalo, ia faimalu faiva. Po o a eseese o manatu ma talitonuga, ia aua ne i galo, e malu ma toafilemu Samoa i ai tatou o taitai, O tatou e foia le popolevale o le atunuu i ni mataupu tuga po o faalavelave tulai mai. Ia manuia faiga filifiliga a lo tatou atunuu.

Ia o le tala lea a Alataua Sisifo ma le faaaloalo. Manuia tele lau Afioga i le Fofoga Fetalai ma sui usufono mamalu uma o lena Maota, faapea foi Samoa ma si ou itumalo pele o faafogafoga tapuai mai, soifua.

Na faaalua le agaga fiafia o le Palemene i le patipati o latou aao i le maea ai o le saunoaga a le Taitaifono o le Komiti o Tupe po o le sui usufono mo Alataua Sisifo.

FOFOGA FETALAI: Ua faamalo saunoa, o lea ua tu i le tula tu i le lima, tu foi le matau i tafue o laau. Ua e sei foi le matila ae kaka ia le ofeloa, aua le faafofoga tapuai mai a Samoa, i le faamaninoga ma le faamalamalamaina o le tulaga i le itu tau tupe.

Ia i le avea ai o lau Afioga ma Taitaifono o le Komiti o Tupe a le Palemene o lo o faapena ona siaki ma faapaleni ia le tuuina mai o le Tala o le Tupe i totonu o le Palemene, ia ma toe lipoti mai i le Fono Aoaofaitulafono a le Palemene, ia o le upu lava e fai i Atua, ua se togi le seu lagatila ua faapulou le tualima se ua faamalo le fai o le faiva. Malo faafetai, ua manino auofala o lea foi ua faafofoga ia le Palemene, ia aemaise foi o le faafofoga atu o le Malo le Afioga i le Palemia o lo o faapena ona fai ma tulai mai, e faamalamalama ma faamanino nisi o mea o lo o faapena ona e saunoa ma malele i ai.

Ia o lea foi o lo o faafofoga tapuai mai ia Ofisa Sili o Matagaluega o i latou o lo o faapena ona outou feiloai i lea taimi ma lea taimi, e faapupula ma faamanino ma faamalamalama ia mea o lo o saili e le Komiti ina ia faapena ona lufilufilimalelei ma pulea ma le tonu seleni ma le tamaoiga o le atunuu. Ia malo faafetai.

Ia o le Atua lava ia e i ai lana faamanuiaga e faapena ona faamanuia atu i lau Afioga, ia aemaise foi o le Komiti. Ia o se upu foi i lou itumalo, ia amuia le itumalo. Faafofoga tapuai mai a Alataua i Sisifo, ia e faapena. A tatou tau i le pa o Fualaga fai mai e sua le tuli aua le alii o aiga. Faafetai, ae a lukaluka foi le tai ma savilivili le gataifale, ia ona sisi lea o le laafa. Ae fai mai le tautai, ia saili ia se tautai matapalapala. Ia ae o se pae ma se auli, ia aua le manuia o le itumalo.

Ia e pei o lea ua ou manatu ai e a foi... e ese le manaia o lou tulai mai aua le itumalo. Ia amuia foi le itumalo talosia ia ia faapena ona latou faafofoga mai, ia e mitamita ai foi le itumalo, o lou uluai taimi lenei ae pau lea o se sui usufono ua... o sona taimi muamua lenei i le Palemene, ae ua tofia e avea ma Taitaifono o le Komiti o Tupe, i lou lea 30 tausaga. Ia e faapena o se meafou e le o se mea e masani ai. Ia ae ui i lea, o le filifiliga lava latou o le valaauina o le mea lena a le Atua.

Ia o le matou tatalo, ou te le manatu e faafulu oe faapea ai ua ou faamimitaina oe. Leaga o mea moni na o lea e tutupu i totonu o le Palemene. O le tele o taimi, o Afioga i le aumatutua e i ai Pule Lameko o latou na, o Faumuina Liuga e Taitaifono o le Komiti o Tupe ae o lea foi e faafofoga mai ia Lauofo e faapena, e molimau i se tala. Ia ae amuia lo outou itumalo o lo o faapena ona latou filifilia oe e fai ma o latou sui usufono. O le matou tala lea, ia o lea ua maea ia galuega a le Palemene, ia o le a saunoa le Malo e

talifuaitau i mea sa laga e Minisita taitasi, ia o le mea lea ua manatu le Nofoa o lea lava e lava le taimi, ae lafo atu ia i lau Afioga i le Taitai o le Malo, lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai faapea foi le mamalu mauuluga i sui usufono o le Fono Aoaofa Fafuafono. Ou te tulai atu e avea au ma sui foi o le matou auvaa e molimoli atu ai le agaga o le faafetai. O lea ua sausi lava ia outou saunoaga sa o matou faia le faiva o le faalogologo ona o le Kapeneta lea e agai tonu mai i ai ia saunoaga a sui usufono o le Maota nei. Sa o matou tutulai atu foi ao ala pea le mafuaalii i tulaga o le faamalamalama o nisi o vaega, ina ia malamalama atili ai, ona o lea ua oo tonu lava i mataupu e tatau ona sooula aua le faafogafoga mai a Samoa.

O le matou tutulai atu ai ina ua uma saunoaga, e toe faaopoopo atu ai e i ai lava si le ono fesootai o matou tali ia ma manatu foi sa lagalaga. O le ala lenei na o matou tutulai atu ai, ma le faamoemoe o le a malamalama foi i lo matou tulai atu, a o vevela pea le uamea. E tatau ona faafeminoi aua e toe fiu e toe tuitui atu pe afai ua maalili, ia i le fegauiai.

Lau Afioga i le Fofoga Fetalai, o le mafuaaga lenei o le matou tutulai atu e foliga sa o matou faalavelave, ae e le o le agaga lenei. O lea la sa outou tamua, sa outou seu i falemua, ae o lenei o le a matou seu i falevaai. O le a matou tali atu, i a outou saunoaga. O le tali foi a le Kapeneta, o le a matua tuutuu lava i le loloto, i le tulaga o mataupu sa outou saunoaga mai ai, ma faamatala atili foi itu taua o galuega o latou faatinoina, aisea? Leaga e faigofie i ai matou ona talanoa ma outou, ae o le faalavelave lea e tupu, e faigata ona soosoo mai, e mamalu o Alii ma Faipule, o lo o tapuai mai ia o tatou faiva, tainane ia le aufaitatalo, o lo o faanonomanu aua le au i luma o lo tatou faiva o lo o faatino nei e tautua ai ia lo tatou atunuu.

O le ala lea afai foi o outou faafogafoga mai, ua fai si umi, ia sala ina umi ona e i ai lava ia vaega taua, a o faagasolo ia le tatou felafolafoaiga, ua o matou matauina, e oo lava i nai vaega iti e foliga ua o tatou mama malamalama i le faatinoga o galuega o lo o fitaituga ai le mamalu o le Malo, ae a le afifio o Minisita, ia tainane foi ia le faatinoga, o lo o faatino e le aufaigaluega a le Malo.

O le Kapeneta o le Kapeneta o lo o faataotoina ia tonu fai, a o le aufaigaluega a le Malo, o latou lea e fautua mai ma faatino. E tele taimi e sau ai le fautuaga mai i lalo, sau lea i luga o le fautua, fai lea i ai o le faaiuga a le Kapeneta, lea e faaigoa o le FK po o le Faaiuga Kapeneta, ae sau i lalo o le PK, Pepa a le Kapeneta, e talanoa ai le Minisita ma lana Faauluuluga. O lea e aumai uma ai lava i i se faamoemoe e tatau ona tilotilo i ai le Kapeneta ma fai ana faaiuga. E alu atu la i luga, o faaiuga a le Kapeneta o le FK.

Fautuaga mai i lalo, faaiuga atu i luga, sosoo loa ma le isi F, o le faatino. O lona uiga ua F, F, F.

A i ai lava la se Faauluuluga e loloto lona foi ia talitonuga e le ioe i le mea lea na avatu i le Kapeneta, faatino lea o le isi F, faamavae. E 4 la F, o lea e faatino ai le galuega. Ae e i ai taimi e le sau ai i lalo ia le F, faamuamua e alu atu i luga le fautuaga. E i ai o lea o le a avatu ia lau faataitaiiga, e faapena le galulue faatasi o Faauluuluga o Matagaluega ma le Kapeneta, o latou Faauluuluga lea faapolokiki.

E i ai le taimi e sau ai le fautuaga i lalo, e tai pei o le fautuaga lenei, ua leva ona faagasolo ia le Faiga Faavae, a faapea e i ai se mataupu e foliga mai ua aafia ai ia se Faauluuluga, faamalolo loa lea le tumau, ae tau se i fai ia le suesuega. E i ai le isi Faauluuluga na ova i le tausaga o faamalolo, i luga o lana aiatatau o lana aiatatau, i lalo o le Tulafono na i ai i le taimi lena, e totogi pea ia lona totogi maualuga o i ai, alu ma le taavale. Afai o nofo i le fale o le Malo, nofo i le fale o le Malo.

Sau ai lava ua leva, sau le isi Faauluuluga fou, fai mai ia lava fautuaga, e le talafeagai e tatau ona toe teuteu, leaga ua i ai le mea lea ua tupu ua tele faamasinoga, a ua le lava ia faamasino. A tuai la ona oo ifo i ai le Faamasinoga, afai lava la e 2 tausaga o lea e faatali, o le 2 tausaga foi lena o la e totogi lava le totogi lenei pe \$100,000 i le tausaga, fealuai i le taavale a le Malo, ma faaalu ai penisini, ia ma totogi, ma faaalu pea lona totogi, ae o la lava e le i faia le faamasinoga, e le o ni aga a le Malo, ae o aga a le Faamasinoga.

Ia o lea la ua sau nei le isi foi Ulu ma fai mai, e tatau ona fai se faiga i le mea lea. Ua lava le masina e tasi, a uma loa le masina lena ua fai le faamasinoga, ae sau toe faaauau, ia ona sologa lelei lava lea. Ia ae a sau foi ua tea, ia o lona uiga, e na o le tasi lava le masina lea e gau ai le Malo.

Lau Afioga i le Fofoga Fetalai e ese le manaia o le fautuaga lea ae sau mai i lalo. Ae o le fautuaga la lea i mea tau taavale, e le i sau mai i lalo le mea, e alu atu i luga, a... e alu atu i luga, e i ai la taavale ia e aumai o le a sui ato le auala. E i ai le tulaga o le suiga o le taimi. E i ai le tulaga o le siiga o le mea o le a foi o le tuaoi e sui ai le aso. E i ai fautuaga e faata ia auala galue e pei la o mea na e alu atu i luga. E sau i lalo le isi fautuaga, ae alu atu i luga... ae fai e le Kapeneta le isi fautuaga. Ia o la e faafogafoga mai leaga e i ai le isi Faauluuluga o le Malo na alu i tua fai mai ua tago le Malo i le mea sa le tatau ona tago i ai.

Lau Afioga i le Fofoga Fetalai, o le Kapeneta lenei e le faatali i le fautuaga e sau i lalo aisea? Leaga o le Kapeneta e aoaoina uma tagata. A tuai mai lalo ua alu atu luga.

Lau Afioga i le Fofoga Fetalai, o le tulaga lena, o lea la ou te... o lea e le i uma lau folasaga, o la e le i faia ia lau mataupu. O le faasologa o le tulaga masani, a oo mai loa ina tali le Malo, ona ou tu atu lea e fai ia ni au upu tomua, tamai upu lava. O lea la e le i uma lava le umi o lau tamai upu, ona

faasolo loa lea. E masani la ona agai i o, i le tulimanu e amata mai o lea foi o le a tou silasila i ai, o le Minisita e pito talavou aulelei tuu lava i le tulimanu. Ae aumai ia le aumatutua e lata mai ia te au leaga ua taulogonoa i isi taimi. Ia o lea la, o le a amata atu i i, o le a sui ia le kia o le tatou taavale. O le a amata atu i le aumatutua lea e nofo atu i ou tafatafa.

O le a le mea o le a amata ai i le ua matua? Ia ua uma foi lona aoga o lea o le a litaea. Ia o le tulaga la lenei, e pei o le faaaloalo lea o le a tuu i ai, o le a ta tamua, ona faasolo atu lea i o tau i le laitiiti la e nofo mai i o, ona faatoa ou tamuli loa lea, i ni mataupu foi lea, ua laaloa ai le vaai a se Minisita. Ia o au la, e taeina ia otaota foi lea e totoe. Ia ona maea ai lea o le matou galuega, masalo pe alu atoa lenei masina o fai lava. Aua o lea sa avatu le matou ava ia te outou, o lea foi o le a aumai la outou ava ia matou, o le a matou ta matou i a matou aga ua tataua ona fai. Leaga o matou lea e alu atu ai faiga faavae. Ae o matou la, matou te fiafia tele i le tou faalavelave mai, aua o le faalavelave mai e matou te iloa ai se mataupu o lea lava e nunu ai le toau ona matou toe faalauteleina lea, ia faalautele mai foi e outou pei ona matou faalautele a outou mataupu e lagolago ai i le tatou galuega.

O le tulaga la lenei, ona o le Afioga ia Tuitama toe pau lenei o lana lauga i le Maota lenei, e tataua la ona tuu i ai le avanoa mo lo outou silafia, ua lauiloa foi i le Maota lenei le tautua a lenei tama. A tu loa Tuitama, ua amata ona outou momoe, aua e moe ai lava ala, moe ala, moe ala, a o la e lava e alu Tuitama. E faapena amio a Tuitama. Ia e alofa Tuitama, o lau toe ta lava lenei, a atoa se vaiaso atoa, e le afaina. Lau Afioga i le Fofoga Fetala, o le itu taua lenei o upu tomua. O upu tomua e amata ai le matou galuega.

A o au lava ia ma tiute foi o lo o aumai ia te au, e faatulaga ai le Kapeneta, e mafai ona faapea; o au lea e taoto mai i ai nisi o Matagaluega o le Va i Fafo, Loia Sili, o le Vaega lea a le Palemia e aofia ai le Femalagaaiga, e aofia ai le Fono Faatonu ma le tatou Matagaluega foi o lo o Pulea Galuega a le Malo. Lea ua faapooa mai i ai ma le Siosiomaga faapea foi ma le Vaega lea o le Fui Mu ona faasolosolo atu ai lea i isi, e lautele. O le faasologa la o faatinoga o galuega, e feiloai lava le Minisita ma lana Matagaluega, o le a se mea e tulai mai e moomia ai e le Minisita, samania lana Ofisa Sili o Pulega ma fesili i ai e aumai sana fautuaga. E le tau faatulagā foi. O lou faitotoa e matala i taimi uma, so o se taimi e manao ai sau Ofisa Sili o Pulega ia te au, e taofi uma lava tagata ae omai, leaga ou te manaomia le fautuaga.

E faapena foi la i Minisita o lau foi lenei tuualalo, matala outou faitotoa. E saili appointment, e feiloai atu tagata i fafo, a o lau fautuaga faapitoa, e matala i taimi uma. O le taimi lava e tupu ane ai se mea e te manao i ai, tapa lau Ofisa Sili o Pulega e sau, o lau advisor, o lau fautuaga numera tasi lea. O le a foi le taimi e manaomia e le advisor e sau ai, na o le logo lava o le failautusi ia faapena ona taofia tagata uma ae sau, sau i totonu. Leaga e manaomia e au ma Minisita le fautuaga. O lau foi fautuaga i Minisita po o le fautuaga e te fiafia i ai, po o le fautuaga e te le fiafia i ai, faalogo. Aisea? Leaga o le

fautuaga e te le fiafia i ai, o lena e afifi mai ai le alofa molipo. O le puipuiga lena o oe, o le puipuiga foi lena o le Kapeneta atoa, o le puipuiga foi lena o le Malo atoa. Aisea? Leaga e tele taimi lau Afioga i le Fofoga Fetalai, e osofaia ai oe i mataupu tau oe lava. O tatou nei e feoi i le lalolagi lenei, e osofaia gofie e le tiapolo. O le ala lena e taua tele ai le tuualalo a le Ofisa Sili o Pulega. O le taimi e le faalogo ai le Minisita i le Ofisa Sili o Pulega, o le taimi tonu lava lena e amata ai ona pio le Minisita ona ua le faalogo, leaga o le Ofisa Sili o Pulega, la e nofonofono ma tulafono. Tulafono uma o lea e faataoto atu ai le amio. E le gata i le latou amio, ae mataitu foi le amio a le Minisita. O le Minisita foi ia, o le tagata e le o se agelu, e faafeagai pea ma le pressure, faafeagai ma le uunaiga mai tua i aiga, faapea foi ma le nuu. Ou te manao e tala mai i tua lau NPF. E matua le mafai, o la e i ai taiala. E matua le mafai e le Minisita ma au o le Palemia. E matua le mafai lava ona tala i tua se NPF i se auala e le talafeagai. A tau atu lava la i le Ofisa Sili o le Pulega e le mafai, o le tali lena e le mafai. A e toe alu la i le Minisita toe sau ia te au, avatu lau tusi pei ona manao i ai, e alu atu e tasi lava le tala e le mafai, aua o la e ilo lava e le Faatonu Sili po o le Pule Sili, o la e fai atu lava le tusi a le Minisita ma le iloa, e le mafai.

A o le taua o le tatou faatalanoaga, lea e tau atu ai mea o examples, mea o faataitaiga o mea o pulega lelei. Aua le aumaia le alofa e faatino ai se mea le talafeagai ma le Tulafono. E i ai le lauga a le faifeau na fai i gatai, na fai agai i Faamasino, “Ia outou amiotonu.” Ona faapea loa lea, o le finagalo o le Atua, e te saofai loa i lou nofoalii i le Faamasinoga, ona e manatua lea, aua aua aua ne i faavae au faaiuga i lou loto alofa, e sese ai faaiuga. Ae faavae i le a? Faavae i le faamasinoga tonu. O fea e sau ai le faamasinoga tonu? E sau i le tofamamao la e afio ai le Agaga Paia.

Lau Afioga i le Fofoga Fetalai, o le taua ia o le itu lena, ma e oo lava i le Faamasino. O le Faamasino lava, ua fai i le alofa ona o le vaai atu i le tagata lea e alofa i ai, ona e i ai le la fesootaiga faalilolilo e le o iloa, pio loa i ina ma le Faamasinoga. Ona a lea? Na fai muamua le iuga ona toe alu lea e tau sue mai ni faamaoniga. O le ala lena e tuai ai ona le tusia le iuga ae se i sue ni faamaoniga e tau foliga ai o la e sa sao lana faaiuga. Ae le o lilo, e le o lilo i le vaaiga a le Matagaluega o le Loia Sili a le Malo. Aisea? Leaga o latou ia o le Loia Sili, o le latou matafaioi lea o le mataituina o le Malo. E oo ia te au ma le mataituina o le Faamasinoga, po o sao a latou Faamasinoga. O le ala lena, i lalo o Tulafono, e mafai ona avea le Loia Sili e tofi sao atu lava e avea ma Faamasino pe avea foi ma Faamasino Sili, ona e maua luga tele le tulaga o lo o tu ai mo le puipuiga o Tulafono a le atunuu lenei ina ia i ai le amiotonu.

O le ala foi lena, o le a le tele o nei finauga sa fai, e tasi lava le Ofisa e faalogo i ai le Malo i lalo o le Faavae, o Loia o le Faavae o le Malo o Samoa. O ai? O le Loia Sili, lea e i lalo o lau vaaiga. Ua ou talanoa soo lava i le mea lea. O le Ofisa o le Loia Sili, o lo o i lalo o le Palemia. O le Ofisa o Leoleo

sa masani ona i lalo o le Palemia, ae ua ou tuueseina atu. A oo lava ina pio le Palemia pe i ai se mataupu ua solia, e molia lava e le Loia Sili. O lea sa ou taua, o la e vevesi le Malo o Isaraelu e tau mai i le taimi lenei i le toeaina la e i ai, ona e i ai foi le mataupu lea e sau lava i tala o le lalolagi, ua faasalalau na te moliaina i luga o nisi foi o mataupu ua le talafeagai. E i ai foi le mea faapena na tupu i le Palemia o Kanata i nai tausaga ia pe 2 ua tuanai atu.

Lau Afioga i le Fofoga Fetalai, o le molimau ola lena o au tautalaga sa fai pea, fai pea, fai pea i inei i le Maota lenei, e oo lava i le tasi o tatou Palemia, na talai ai lava ona tusi tofiga ona o le Faamasinoga, ona o le Tulafono. A o ai lea e faia mea ia? O le Ofisa o Leoleo ma le Ofisa o le Loia Sili i lalo o le pulega a le Palemia. E oo foi i Palemia ma Ao o isi Malo, ua molia foi i le Tulafono ae faatino e le Ofisa o le Loia Sili.

Lau Afioga i le Fofoga Fetalai, o le ala lena o lea sa ou tutulai atu ai pea i le tuuaia pea tuuaia pea tuuaia pea o au e le Afioga i le faipule o Gagaifomauga Nu.3 ma toso atu ai au i o, o lea ou te aafia ai, ou te le aafia i ni mea faapena. Ae a sau lava i le tagata ua lauiloa le fai o ni faamatalaga le sao, e oo lava i i, o le mea sili ua matua matamata le atunuu, faalogologo le atunuu ma tilotilo mai i TV o fai se tala le moni, o le tusia o le igoa, e le o se igoa sao, o le igoa pepelo i luma i i e faavae ai le tautoga. O le tautoga i luga o le Tusi Paia, luga o le Tusi Paia. Afai la o le tagata e tauto i luga o le Tusi Paia ae pepelo, o a nisi mea i tua atu? O a nisi mea i tua atu? E toe taofiofi mai ai, ua laasia le tuaoi o le mea e tatau ona taofi mai ai le tagata e tatau ona faatino le amiotonu.

Lau Afioga i le Fofoga Fetalai, e le i taitai uma le lauga ae o lea ua ou vaai atu ua ta le 1:00 ae le i uma le folasaga. Se i faamaea ia le folasaga i le aso a taeao.

FOFOGA FETALAI: Malo faafetai.

Afioga Hon Afamasaga Lepuii Rico Tupai: Lau Afioga i le Fofoga Fetalai, e puupuu lava si mea lea lau Afioga.

Ou te tulai atu ma le faaaloalo, ua faaalua le finagalo o le Afioga i le Palemia i le faasologa o le Kapeneta. Ia ua manatua e le matou tulimanu le kapeteni matautia foi lea a le All Blacks sa i ai o Richie Mcaw ina ua taunuu mai i lana faamavaega. Ai ona o le Afioga lea i le Palemia e Taitaifono i le Lakapi, ia lea na outou maimoa i ai i le faitau afe ma afe o tagata sa maimoa i le taaloga, ia na tutu uma tama taaalo i tua ae muamua i totonu le Kapeteni o le All Blacks. Ia o le faaaloalo maualuga lena lea na ave i ai e le au aemaise le Malo o Niu Sila.

Ia, ou te manatu ai o le faaaloalo lea ua lafo e le Palemia i le Afioga ia Tuitama. Tuitama, Honourable Tuitama Talalelei Tuitama, ia manuia lou tamua aua le tatou Kapeneta. Faafetai.

FOFOGA FETALAI: Malo faafetai. Ia o le tofiga lava a le Palemia, aua e pule lava le Palemia po o fea o le Kapeneta e amata atu ai. Ia, a o lea ua toe faamimita lava e le isi Aana le isi Aana. Ia e talafeagai. A faapefea o le toe taimi lenei o si toeaina. Ioe. O le matou toe taimi lenei ma Faasoo ma Tuitama, a o faafofoga mai le atunuu. Tautuana ma outou ia outou alolofa ia matou pe a outou tulai mai i le faamanuiaga i lea foi Paeaiga, ia alolofa mai ia matou lea o le a le toe omai.

O le mea la lea, ua manino ma malamalama lea tulaga pei ona saunoa i ai le Afioga i le Palemia. Ia e le tau oo foi i ai se tala a le Fofoga Fetalai, leaga e le o se pepelo na fai i se isi mea, o le pepelo na fai i luma atu o au. Ioe. O la e molimau uma outou e 50. Ioe. E le i faia i se isi mea na fai lava i luma i i, ae molimau foi Ofisa Sili o Pulega o Matagaluega aemaise o Samoa ma le itumalo sa auai. Ia, ta te musu e toe oo i ai i lea tulaga, ioe, e le tau avatua i luma. Ae tau ina ia aoga pea i sui usufono mamalu tulaga o ia faatamala ma ia tulaga le manuia sa tulai mai aua e le faapena ni uiga e tulai mai ia i latou o e o lo o fia taitai i le atunuu.

Ia, ae talu ai ona o lea ua tatou taunuu i le taimi manava o lenei foi aso, malo faafetai. E faamalulu atu foi i sui usufono mamalu pe a i ai se upu a le Nofoa e sopotuaoi pe paopapa, ia, ia finagalo i le Atua e magalo ai se faamatalaga a le Nofoa.

Ae tatou te le i tolopo ou te tapa le sui usufono mo Aana Alofi Nu.2 le Afioga ia Ili Setefano e tulai mai e faaiuina le tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 1:08 i le afiafi seia aulia le Aso Tofi, 18 Fepuari 2021 i le itula e 9:00 i le taeao.